

أحمد فؤاد سليم

عجبا يسب

SCANNED BY
JAMAL HATMAL



صاحب، عبدالقادر فواد

أحمد فؤاد نجم

مجايب

* فؤاد نجم

ان
T
1111

٥٥١
(٥٠٠٠٠٠٠٠٠)

الناشر : مكتبة مدبولي الصغير

٤٥ شارع البطل أحمد عبد العزيز

تليفون : ٣٤٧٧٤١٠ - ٣٤٤٢٢٥٠

ميدان سفنكس ت : ٣٤٦٣٥٣٥

جميع حقوق الطبع والنشر محفوظة

الطبعة الأولى : ١٤١٤ هـ - ١٩٩٤ م

١٥٩٤

الغلاف للفنان : عمرو فهمي

إهداء

إلى الصديقتين .. صبين ميم
أوجعتني بفكرة تحويل هذا النص إلى كتاب
والصديقين عما طُف من صور
بذل جهداً خارقاً لتحويل الفكرة إلى واقع ملموس . وفي
زهد قياسي

فلا كما الشكر .. كل الشكر

نجيم

افتتاحية

موال عجائب

يا بحر قول للسمك .
طول ما الشبك فوقك
لا العشق كارك
ولا رمل الشطوط شوقك
إنزل قرار النجا
واغطس ولا تقبش
موج العلالى خطر
فى النوه ومغيش
دارى على شمعتك
وتحب ما تحبش
الصبيح نور ياسمك
واعشق على ذوقك

* *

أغنية المجموعة

كباريه عجائب .. يا حلولى
لا تقوللى سيما .. ولا تقوللى
هنا ابن آدم ع المكشوف
ادخل وشوف
واطلع قوللى
على ناس بتشرب عرق الكاس
وناس بتسكر وتولى
وناس تمز بلحم الراس
وناس بترقص وتصلى
عطيل ده أمين ابن أم عطيل؟
ومين سى هاملت يالا للى؟
ومين حسن ونعيمة مين؟
ومين شقيقه ومتولى
أبطال عجائب ناس عايشين
ودى الحقيقه الللى تخلى
كباريه عجائب لا تقوللى
مرسح وسيما
ولا تقوللى

* *

فى الكباريه

(موائد الكباريه مكتظة يسمع من الخارج صوت صفافير

وضوضاء)

إلحقى.. إمسك

حلق.. حرق

مجرم هارب

ما تسيبوش

(يتخن كموته فى حالة زعر وينزوى فى أحد الأركان دون أن

يراه أحد فتدخل خلفه مجموعة بوليس يبحثون عنه)

البوليس هم هم هم هم هم هم

هم هم هم هم هم هم (يخرجون)

(يخرج من الركن متنكراً فى زى جرسون.

زيحنى)

غايه كلابيا ديباه

نازئين فى الناس هم

واللى يتام فى الغايه

راح يتاكل هم

واللى يدير وشه

غمضة عين يتهم

مائدة (١) وكموته يقترب منها

إنما قوللى يامحس بيه

رجل

أنت عملت فى صاحبك ايه؟
 عمله خفيفة .. كالت مراته
 ده انت حنون جداً وقنوع
 الموضوع ..
 ماتموضعش يامحسن بيه
 المرجوع يرجع أصلاً للى اتسبب فى الموضوع ..
 مين كان قال له ياخذنى برجلي لحد البيت ..
 هو مأمك ..
 وأنا حبيبت .. واحده بواحد وكده خالصين
 طب والبرزنز؟
 مش فيه بزنز بينه وبينك ..
 ماشى حلاوه ..
 أما براوه
 (كمونه يغنى)
 واللى يغيب عن جحره ..
 لجل القوت والمم
 يتخان من ورا ضهره
 أو يتاخذ خم ..
 غابه بتاكل ميته
 غابه بتشرب دم ..

(البوليس فى كبسه ويختفى كمونه)

البوليس هم هم هم هم هم هم هم،

هم هم هم هم هم هم هم

الحق إمسك.. حلق حوش

مجرم هارب.. ماتسبهوش (يخرجون)

• • •

مائدة (٢) (وكمونه يقترب فى زى مصوراتى)

رجل أعمال يامحمد بيه أنا بززمان

مش عارف ليه على بيه زعلان؟

الآخر ده مدير البنك

يعنى المحطوط وش المدفع

وانت لا حتدفع..

كمونه ولا تشفع

الآخر دى شوية قشره وفضيات

وحيليف قرض بدون ضمانات

ح يصفصف لك الفين باكو

وتزوغ على لندن وموناكو

والراجل حيشيل الداھيه

وغايتها حيلدع ميت باكو

رجل أعمال ميت باكوازى؟
 ده حيلهف زى أرنبتين
 الآخر حيسلم أرنب للهانم
 ويرش له أرنب ع المعازيم
 رجل الاعمال معازيم على ايه؟
 الآخر مولد ياغشيم
 كمونه وصحاب المولد فى التوهان
 رجل الاعمال شيللاه ياجناب صاحب المولد
 (كمونه يغنى)

غابه كلابها ديايه ..

نازلين فى الناس هم ..

غابه وناسها غلابه

خيخه لا ناب ولا فم

متكلين ع الصدفة

متاكلين بالهم.

• • •

(البوليس يدخل فيختفى كمونه)

هم هم هم هم هم هم هم هم هم هم

الحق إمسك .. حلق حوش ..

مجرم هارب .. ماتسييهوش ..

• • •

(على باب الكباريه)

ياسيدى سيبنى الله لا يسينك	رجل
ياعم خش الله يهديك	السمسار
أخش فين.. هى دى وزارة	الرجل
واكثر.. دى غرفة عمليات	السمسار
وفيه ختم النسر الدولى..؟	الرجل
وفيه ديل التعلب فات	السمسار
ح نتفق هنا ع الترخيص	الرجل
عشان ابنى شقه للأولاد	
ونقابل البيه ذات نفسه	
بتاع تراخيص الاسكان	
ياعم خش.. مادمت فى شلى..	السمسار
هنا حتقابل ملك الجان	
حاجات غريبة يا حاج غريب!	الرجل
إنت اللى لسه جديد ع الكار	السمسار
هنا المسائل تتخطط	
طول ما الغوازى بتتنطط	
لا حد شاف ولا حد اتشاف	
فهمت ولا حتستعبط	
(كمونه يكون قد اقترب منهما فى شكل بائع	

نظارات شمسية وساعات روسكوف - ثم يغنى)

كمونه

واحنا ياملح الغابه

هم يحرك هم

فاهمين وبتغابى

مش فاضيين نهتم

قادرين بس غلابه

مش راضيين نتلم

(يدخل البوليس فيهرب كمونه)

البوليس هم هم هم هم هم هم،

هم هم هم هم هم هم

الحق امسك.. حلق حوش

مجرم هارب.. ماتسيبهوش

• • •

مائدة (٣)

رجل أعمال أما البيه مأمور المينا دا جنتلمان

الراجل فوت لك مركب فى الكتمان

لحم وبولوييف مضروب

ولبن فسدان..

أما البيه مأمور المينا دا جنتلمان

الآخر	مأمور مين وبطاطس مين..
	كل البركه فى السعدان
الأول	أيوه ياسيدى نسيب الباشا
	فيه اشاعات على انه شريكه
الآخر	هى دى عايزه اشاعه كمان
الأول	انما كلّ فى الخبطه دى كام
الآخر	لهف الهاف وادانى الهاف
الأول	يعنى يادوب العيش الحاف
الآخر	ياللا ياسيدى
	خيرها فى غيرها..
	(كمونه الذى اقترب منهما متتكرأ فى زى بابا
	نويل ويبيع لعب أطفال)
كمونه	خيرها فى غيرها يابن الرفضى
	لسه حتقتل أطفال تانى
	ومسميها خيرها فى غيرها
	أمك تشرب من مناخيرها
	(يقلب عليهم المائدة ويهرب)
	(يدخل فارس تسبقه مجموعة من الحوريات)
فارس	- سايق عليكو النبى
	يامطيرين صيتى

لا بحرکم ملعبی
ولا برکم بیٹی ..
أنا منزلی فی السما
بین النجوم .. ربما
وأیما سهم اترمی
ما یجیب أساس حیطی
سایق علیکو النبى
(یخرج فارس بینما کمونه یدخل فی هیئة
جرسون)

کمونه - وحید وضایع فی وهم وحده
ساکن فی نفسه ونفسه لحدہ
وحتى لما حلم وغنى ..
طول عمرى عایش
وعاش لوحدہ
(تدخل مجموعه من كبار القوم تتجه الى مائده
مکتوب علیها «محجوز الى الأبد»)
المجموعة شبيط لبیط
وآدى آخر الخیط
وصل اللبلاّب نطاط الحیط
وشك مقلوب .. إعدل یازعیط

أحسن ماتروح.. ترجع مجروح
لا تعمربيت.. ولا تزرع غيط
نور توا المطرح يابشوات
منور الدنيا يا حديدى بيه
والسعدان بيه منور الدنيا والآخرة.. عن قريب ان
شاء الله
اتطرق يا بنى ما فيش بقشيش
أنا باخدم وهبه لوجه الله
مستنظر كلمة شكر..
ما فيش..
انشا الله مفيش
وتروح ماتجيش
وتبات شايفان.. تصبح شيش بيش.... (ينصرف)
الحلوانى بكره هنا..
الحلوانى؟
أبو الوفا الحلوانى بكره هنا..
إتأكدتوا ميه الميه؟
من مصادرنا.. مصدر عاجل أبلغ بالتليفون
السرى..
وصل الراجل..

السعدان

برضك حبيبت في الفندق

الحديدي

أيوه ياسيدي

الليله يبيت على بابنا

والصبح يشرف أعتابنا

السعدان

يبقى كده .. معنا توكدہ

بكره طواریء ..

مش حنشوفك بكره هنا؟

الحديدي

هنا ممنوع مسئول يتواجد

ودا من إيه؟

السعدان

أمر الباب العالي ياسيدي

الحديدي

إن الإيه؟

السعدان

إن الراجل لوجه بكره قفش مسئول هنا في

الحديدي

الكباريه تبقى فضيحة ..

ويبقى كلام الباشا بذاته

عن مصقوفة الرقبه عجائب

كله أونطه ..

وكذب في كذب .. وأبصر إيه ..

السعدان

أما أوامر ..

طب والدوريات الهايجه ليل ونهار

أصل الواد كمونه هرب

الحديدي

واد معجون بتراب عفاريت

السعدان مين كمونه .. ومين ينسونه ..

أما حكومه صحيح مجنونه

الحديدي ياسعدانى ماتتهورش

أصل الواد ده ماتتصورش

كل الخوف ليقابل الراجل

ويفتق له ..

تبقى فضيحه

السعدان ماتقولها لى صريحه مريحه

الحديدي الحلوانى لو يكشفنا حيقطع عنا أى معونه

يعنى أنا وانت وياقى الصحبه ناشفر خالص

السعدان خالص مالص؟ وإن حبيت تلعب لك لعبه ..

الحديدي لعبة إيه .. دى بلد مديونه

السعدان أما حكومه صحيح مجنونه

هو الراجل مش متبلغ

إن البلوى سببها عجائب

الحديدي بلوى ويس؟

كل بلاوى الكفر الراحه

وكل بلاوى الكفر الجايه

هى سببها ..

أمال إيه معنتها غزبه؟

(المذيع الداخلى بهدوء)

المذيع أيها الساده انتبهوا.. فقد حانت ساعة الانتباه..

الحديدي (يقف محيياً) تمام يافندم

السعدان (يشده) اقعد ياسيادة اللوا.. ماتفضحناش..

المذيع (صارخاً) والآن مع الراقصه الانشطاريه والمطريه

النعقوديه نجمة الموسم.. وكل موسم.. عجائب

(كمونه)

كمونه ياميت صلاة النبي

ياميت صلاة الزين

الشمس نور النبي

والحلو نور العين

البحر كركر لها

والنجمه غمرت عين

وأما القمر فى السما

شافها - انكسف ليلتين

المذيع والآن مع استعراض المواسم.. عجائب

عجائب عجائب

ياورد الزرايب

فى أول شبابك

مفرهد ودایب

أشمك تسخسخ أضمك ترخرخ

واحنن واغازل وأكايد عوازل

ولا تبیل ریقی یاخایب یانایب

عجایب

عجایب وقلبی علیک لما رفرف

وطفطف وراح لك وفضفض وباح

نضرتك لقیبتك مدهول فی زینك

ومستنی لون الربیع اللی راح

كأنك یاعتر الجناین كلام

وقالك متیم ف لحظة هیام

كأنك روایه كأنك منام

صحیت منه خایبه ولا نابنی نایب

عجایب

(كمونه - جالساً بین الجمهور - متنكراً بعباءة فوق

ملايسه

لیلة الوداع یاعجایب .. عظمه علی عظمه یاست -

إن شاء الله وداد مش وداع

واللی عایزین یقفلوه حیثقفل فی وشهم - ربنا

یقفلها فی وشك یاحدیدی - ربنا یهدك یابو

صفيحه - (يهتف) - عاجيب عاجيب

- ينيك ياكمنه .. إنت ياواد شارب؟

- كمنه .. كمنه امسك الحق حلق حوش مجرم

هارب ماتسييهوش (يهجمون عليه فيقلد مصارعى

الثيران بالعبايه وأخيراً يلقى عليهم العبايه ويهرب

بمساعدة عاجيب).

عجائب

أصوات

اللوحه الأولى

- مجموعه من المخبرين ومعهم ضابط فى حالة
 حيره وتبرم
 الضابط أنا مش فاهم هما خايفين من الواد ده قوى كده
 ليه؟
 مخبر الواد خطر ياباشا
 الضابط ارهابى يعنى؟
 مخبر دا واد غلبان ياباشا . بس ربنا مسلط عليه لسانه
 الضابط وايه اللى حيوصله للسيد أبوالوفا الحلوانى
 مخبر يوصل ياباشا دا والعياذ بالله نطفه شيطانى
 الضابط وقدر إنه وصل
 مخبر حيقول للراجل على كل اللى بيحصل فى
 كفرسين .. من طقطع لسلامو عليكم
 الضابط وهو يعرف منين اللى بيحصل فى كفرسين؟

مخبر لأ من جهه يعرف هو يعرف ياباشا . دا واد والعياذ

بالله يعرف إيليس مخبي ابنه فين

(صوت من الخارج) يا حطابط فؤاد.. انت

ياشوايش سرحان.. ياداوريه

الضابط ياساتر دا أبو صفيحه الرزل.. انتياه

(أبو صفيحه يدخل فيؤدون له التحيه العسكريه)

أبو صفيحه لقيتوه؟

الضابط حالاً يافندم

أبو صفيحه هو ايه اللي حالاً.. باقولك لقيتوه؟

الضابط بندور عليه يافندم سيادتك

أبو صفيحه بتدوروا عليه يافندم سيادتي؟ طب ايه رأى

سيادتك بقى ان بيوت أهاليكم جميعاً وأولهم طبعاً

بيت أهل سيادتك... حتتختم بالشمع الاحمر لو

الواد ده ما جاش النهارده.

مخبر لوفى بطن أمه حنجيبه يافندم.. ماتخافش

سيادتك

أبو صفيحه للمخبر: تعالى انت هنا.. قرب كمان شويه

(يصفعه) فيه حد يقول لعبدالجبار أبو صفيحه

ماتخافش.. اللي ممكن يخوفنى لسه أمه ما حبلتش

فيه.. فاهم يا حمار

(صوت من الخارج) يا بوصفيحه .. انت يازفت

يا عبد الجبار

أبوصفيحه دا الحديدى بيه شخصياً .. نهار أبوكو طين .. انتباه

(يدخل الحديدى فيؤدون له التحية العسكرية)

الحديدى لقيتوه

أبوصفيحه حالاً يافندم

الحديدى هو ايه اللى حالا .. بأقولك لقيتوه

أبوصفيحه بندور عليه يافندم سيادتك

الحديدى لسه بتدوروا يا عبد الجبار .. نهار أبوك أسود من

قرن الخروب الراجل على وش وصول يا اولاد

الكلب يانتابله .. طب قسماً عظماً يا عبد الجبار يابن

زبيده الخاطبه ان ما غطست وقبيت بالواد العطار

لاكون متحفظ عليك فى مكان أمين لحين ظهور

جسم الجريمة اللى هو الواد كمونه العطار ذات

نفسه لاكون متحفظ عليك فى مكان أمين لحين

ظهور جسم الجريمة

أبوصفيحه ليه دا كله يا باشا داحنا كلنا عايشين بحسك ومع

ذلك الخمس سنين اللى خدمتهم مع سعادتك الحمد

لله الأمن مستتب فى كفرسين

الحديدى أمن؟ شيلاه يا حاج أمن .. ايشحال لو ما كنتش

بتلهف نص ميزانية الكفر.. حسبي الله ونعم
الوكيل.. عيب عليك داننت مشغل نص الكفر
مخبرين والنص الثانى بيشاور عقله.. وحتة واد
عطار هلفوت مش عارف تجيبه.. ولسه بتقول لى
الأمن؟! يابجاحتك ياأخى

أبوصفيحه
أنا مش طالب غير رضاك عنى ياباشا. والدليل
انى ح احبس الواد من غير اذن نيابه.

الحديدى
ومين جاب لك سيرة الحبس ياغبى - إنت مش
قريت الأمر السرى

أبوصفيحه
وحفظته سعادتك ياباشا

الحديدى
طب سمع

أبوصفيحه
(بيحث مرتبكا فى جيوبه وأخيراً يخرج ورقه يقرأ
منها) على أجهزة الأمن أن تتوقع زيارة غير
متوقعة للكفر من السيد أبوالوفا الحلوانى وعليها أن
تحول دون لقاء الضيف الكريم بأحد من الحرافيش
وعلى وجه الخصوص - المسجل خطر - عبدالودود
الاخضر وشهرته كمونه العطار.. سرى وعاجل
للتنفيذ.

الحديدى
ولما هو سرى يافالح الواد عرف متنين؟

أبوصفيحه
وسعادتك عرفت متنين انه عرف؟

أمال هريان ومستخبي ليه يانبويه؟	الحديدي
وسعادتك عرفت منين انه هريان ومستخبي؟	أهوصفيحه
الله يخرب بيتك.. أمال ماجبتوش ليه يا جاموسه؟	الحديدي
نجيبه يا أفندم سعادتك	أهوصفيحه
يتاخذ ع التخشيبه يتنجد أفرنجي وبعد الزياره	الحديدي
تلقحوه على أى رصيف ولا من شاف ولا من	
درى، و..... (يهمس فى اذن أبوصفيحه)	
أفندم (يبتسم) حظابط فزاد	أهوصفيحه
أفندم ياباشا	الضابط
(يهمس فى أذنه)	أهوصفيحه
(يبتسم) شاويش سرحان	الضابط
أفندم ياباشا	المخبر
(يهمس فى اذنه)	الضابط
أى نعم ياباشا.. كل البضاعه بتبقى فى المخله	المخبر
اللى معلقها تحت باطه	
(يهمس فى اذنه)	الضابط
بصراحة ياباشا ماتقولش لعدوك عليها دى حاجه	المخبر
متجربه..	
اسال سعادتك السعدان بيه أهو متجوز أربعة..	
بالك لو مش المدعوقه دى؟ كان انكشفت	

الضابط (يهمس فى اذنه وهو يزغده)
 المخبر نصادرها ياباشا ولا يكون عندك فكر
 الحديدى الواد يابوصفيحه والمخله
 أبوصفيحه حنجبيهم سعادتك يا فندم ماتخافش
 الحديدى (للمخبر) تعالى انت هنا.. قرب كمان شويه
 (يصفعه) انا اسمى اللوا الحديدى على سن
 ورمح.. واللى يخوفنى يا شاطر لسه أبوه ماخطبش
 امه فاهم؟
 (صوت من الخارج) انت ياهباب البرك
 يا حديدى.. جبتوا الواد (الجميع بما فيهم الحديدى
 يصطفون ويقولون وهم يؤدون التحيه العسكريه...
 حنجبيه سيادتك يا فندم.. ماتخافش
 (يطفأ النور ويسمع صوت صفعات
 وصيحات ألم)

أمام منزل عجائب

(باب صغير لمنزل قديم متواضع .. تتناثر على
الجدران عبارات مكتوبه بفرشاه جبر وبخط بدائي
مثل - هذا منزل الراقصه عجائب - ياداخل هذا
المكان صلى ع النبي العدنان - الحسود لا يسود -
العين صابنتي ورب العرش نجاني - الصبر مفتاح
الفرج - مرحباً بالتقارب العربي وتصفيه الأجواء ..
إلخ .

(يدخل كمونه متنكراً في أسمال درويش يحمل
مبخره يتصاعد منها الدخان .. يتلفت بحذر ويكلم
نفسه بصوت مسموع)

كمونه

قالبين على الدنيا ليه؟ .. عايزين منى ايه؟ والله
عال ياكفرسين ولسه اللي يعيش ياما يشوف ..

طب لو جدعان بقى هاتونى (يسمع وقع أقدام آتیه
 فيديير المبخره وهو يقول) الورد كان شوك من
 عرق النبى فتح .. صبح يارورد الحجاز ع المغرمين
 صبح .. مبخراتى من عين مراتى بافطر فلافل
 وياً الاسافل واتغدى جبنه وفول حرأتى ابريقى
 ريقى أشرب وأمصمص عرق شفایفى ولا حد
 شایفى واشوف طريقى بعيون صديقى مش عين
 حماتى .. صلى ع صاحب الروايح الزكيه

(يدخل السيد أبوالوفا الحلوانى متلصصاً فيرى الدرويش)

أبوالوفات س س س يا حاج

الدرويش (يلتفت فيرى السيد أبوالوفا) مين؟ بسم الله

الحفيظ .. أشتاناً أشتوت

أبوالوفا (محدراً) هش .. وطى صوتك (يتقدم نحوه)

الدرويش عندك .. لو قدمت خطوه واحده ح اقرأ عليك قل

هو الله أحد أحرقتك

أبوالوفا ياراجل ياأهبل .. ماتخافش

كمونه (يتأمله) ماأخافش؟ (يتأمله ثانياً) الخالق

الناطق هو ..

دول لازم قتلوه وده عفريتته .. الله يرحمك ياسيد

أبوالوفا ياحلوانى ..

- أبو الوفا أنا أبو الوفا .. ماتخافش يا حاج ..
 كمونه طيب وريني رجلك .. أيوه العفريت بتبقى رجليه
 زى رجلين المعيز.
- أبو الوفا ماتعقل بقى يا حاج .. عايز أتكلم معاك شوية ..
 انت ماشفتنيش قبل كده ؟
- كمونه شفتك فى التليفزيون وفى جرايد المعارضه .. انما
 ايه اللي حدفك على درب الغوازي فى ساعة
 فجرية زى دى ؟ .. انت مش معادك تيجى بكره ؟
 وجاى لوحدهك ليه ؟ .. فين الموكب .. وعايز مين
 هنا ؟
- أبو الوفا أنا جيت بدرى يوم .. من غير مواكب ولا وسايط
 ولا حراس علشان عايز أتكلم مع الناس عايز أفهم
 منهم ايه اللي بيحصل فى كفر سين ..
- كمونه اللي بيحصل فى كفر سين ما حدش يصدقه
 أبو الوفا ليه ؟
 من غير ليه
 والناس أخبارها ايه
- كمونه الناس شايفين وساكتين .. الشر هنا حاكم ومستحکم
 أبو الوفا طبعاً يا حاج لأن أهل الشريد واحدة وأهل الخير
 متبعترين يارلداه

كل الناس في كفرسين يعرفوا المساعدات اللي بتقدمها لنا حضرتك .. ياقرفه على جنزيبل معجون بجوزة الطيب يا حبة البركة ..

أبو الوفا

(يتعرف على كمونه) مين؟ .. كمونه .. إزيك يا كمونه .. كويس إنى شفتك .. إنت بقى اللي حتقولى وحترسينى

كمونه

أرسيك على إيه .. المسائل واضحة وياينه ومكشوفه ومفتوحه ..

يعنى على عينك ياتاجر .. الناس في كفرسين يعرفوا المساعدات اللي بتقدمها لنا حضرتك .. يعرفوها بالقرش والمليم .. لكن بقى مابيشوفوهاش فيه ناس تانية بتشفطها .. الدعم لا يصل الى مستحقه يا محترم ..

أبو الوفا

طيب اسمع يا كمونه .. لو سألتك عن المشكله الرئيسيه في كفرسين تقول إيه؟ ...

كمونه

المشكله الرئيسيه في كفرسين هي كفرسين نفسه .. دى فزوره؟ ...

أبو الوفا

الفزوره هي سكوت الناس ع اللي بيحصل في كفرسين .. الشبعان بيخطف لقمة الجعان واللى فوق راكب ع اللي تحت ومدلدل رجليه والقوى

الدرويش

خايف م الضعيف وفتح عينك تاكل ملبن ..
والجبين سيد الأخلاق .. ناس هايصه وناس لا ييصه
ياسيد أبوالوفا .

أبوالوفا

والمستولين

الدرويش
فى التليفزيون يا حلوانى - أول صباeck مايلمس
المفتاح .. يروحوا ناطين فى وشك .. سمان قوى
ومتختخين قوى وملمعين قوى ومبسوطين
قوى قوى وبيضحكوا ماتعرفش بيضحكوا على
مين؟

أبوالوفا

أيوه لكن

الدرويش
ماتقاطعنيش .. سيبنى أفضفض بدل ما أفرقع

أبوالوفا

والخلاصة يا حاج

الدرويش
الخلاصه ان العالم دى زباله وكدابين قوى
والكذب خيبه يا محترم

أبوالوفا
لا مؤاخذه يا كمنه يا بنى .. هو انت ماتعرفش

تتكلم زى مخاليق ربنا

الدرويش
مش الأول أعيش زى مخاليق ربنا .. يا حلوانى

أبوالوفا
معاك حق .. كمل يا حاج كمنه .. كمل

الدرويش
وكله كوم والبيانات الرسميه كوم

أبوالوفا
بيانات بخصوص ايه

الدرويش

بخصوص اى حاجه .. كل ما تحصل مصيبه فى الكفر يطلعوا لها بيان لا يحل ولا يريط .. وخالتى وخالتك وانفرقت الخالات .. آخر بياناتهم الرسميه كان عن المجاعه اللى دايره فى الكفرزى الطاعون لاسود .. بيقول ايه البيان ده ؟ بيقول ان سبب المجاعه دى هو غضب ربنا على اهل الكفر! وماقالوش ايه السبب فى غضب ربنا على كفرسين

أبو الوفا

قالوا طبعاً .. هما يقدرُوا مايقولوش .. دول عيائين بالكلام ..

كمونه

سابولك ياسيدى كل الجواسيس والمهريين وتجار اللحم الحى ولصوص المتاحف والمصاحف وحيثان توظيف الأموال وملاك العمارات اللى بتقع بالعرسال فى شهر العسل وصيادله بقوا تجار جنس ومخدرات وأطبا بيتاجروا فى المرضى والأثم وأساتذه بيتاجروا فى العلم والمعرفه وكتاب ماسكين الصاجات والمباخر بعد ما هجروا الورق وقصفوا القلم وأفضل أعدلك من هنا للسنه الجايه واطلع ناسى النص يا حلوانى .. سابولك ده كله وحطو مهمم فى بت غلبانه لا بتهش ولا بتنش ..

- أبو الوفا .. عجائب ..
 كمونه .. الله .. ما إنت راسى ع البيرو غطاه .. ياد قرم إنت ..
 أبو الوفا .. إنت بتجيب الألفاظ الغريبه دى منين؟ ..
 كمونه .. كتر الحزن يعلم البكا يا حلوانى ..
 أبو الوفا .. أنا عايز أقابل عجائب على انفراد
 كمونه .. أيوه كده هات م الآخر (يضحك) حتى انت
 يا حلوانى ..
 أبو الوفا .. ولد .. إنت فهمتنى غلط .. أنا عايز أقابلها فى سبيل
 المصلحه العامه ..
 كمونه .. لأ .. حلوه دى .. ملعويه ..
 أبو الوفا .. وبعدين وياك
 كمونه .. ولا قبلين يا حلوانى .. ما كلكو بتقولوا كده فى
 الأول .. ناس فى سبيل المصلحه العامه وناس فى
 سبيل الوطن .. وناس فى سبيل العداله الاجتماعيه
 وناس فى سبيل الله .. وكله ماشى فى سبيل واحد
 لأ .. بأقولك إيه ..
 أبو الوفا .. ياعم لا تقوللى ولا أقولك .. (ينادى) يابت
 كمونه .. يا عجائب .. عجائب .. عجائب ..
 أبو الوفا .. (تدخل) مالك يا واد يا كمونه .. بتجعركده
 كمونه .. لاشتك أعريه؟ وإيه يا واد اللى إنت عامله

	فى روحك ده ؟ ..	
كمونه	متنكر يابت	
حبايب	(تضحك) يا شيخ اتنيل .. عايز تتنكر استحمى والبس نضيف يا أهبل (يضحكان)	
كمونه	طب خشى بقى على عمك السيد أبو الوفا .. عنده بقين حيقولهم لك .. وفيها خير بإذن الله	
عجايب	خير اللهم اجعله خير	
كمونه	حبي على ايده يابت	
عجايب	امشى حبك برص وعشره خرس انت وهو	
أبو الوفا	الله الله الله	
كمونه	يابت ماتفهميش غلط دا راجل حلو قوى ماتخافيش منه	
عجايب	(تتف فى عيها فى حركة سخريه) يامى .. الحقونى .. العو حياكلنى وح أخاف من إيه ان شاء الله ؟ أنا مش شايفه حد هنا من أساسه .	
أبو الوفا	وليه الغلط بس ياست عجايب	
عجايب	مش سامعه بيقول ايه	
أبو الوفا	أسكنت انت شويه ياكومونه .. كلمينى أنا ياست	
	عجايب	
عجايب	نعمين يا حلاوه	

أبو الوفا	حلوانى .. اسمى أبو الوفا الحلوانى
عجائب	عاشت الأسامى ياسكر
كمونه	ما هو ذا يابت اللى ببيعت المعونة السنوية لكفرسين
عجائب	(تتفجر ضاحكة وتتبادل الضحك مع كمونه) لا .. إنت بتهزر .. معونه حته واحده؟ وسنويه كمان؟ (تستمر فى الضحك) هيه .. كمل سيادتك إحنا كنا عند المعونة .. خلاص خلاص .. المعونة
أبو الوفا	هى فى الحقيقه مش معونه ..
عجائب	(فى تهكم واضح) أمال بسلامتها اسمها ايه؟
أبو الوفا	دين يا عجائب يابنتى .. دين فى رقبتى لكل فرد فى كفرسين .
عجائب	مديون لبلد بحالها؟
أبو الوفا	صغيرها قبل كبيرها .
عجائب	ليه كنت بتلعب قمار؟
زي الوفا	الله يسامحك ..
عجائب	أمال كنت بتستلف علشان تحوش فى البوسته؟
كمونه	يابت انتى أصلك ما كنتيش لسه جيتى من بلدكو (لابو الوفا) عدم المؤاخذه يامولانا البت دى أصلها فى الأصل أرياف .. أمال هى جايه الجدعنه دى كلها منين؟

- عجائب ياخوريا بطل رعى وخش لى فى الموضوع .
 كمونه أقول لها ياسيدنا؟
 أبوالوفا قول لها ياكُمونه .. أنا قلبى انفتح لها .
 كمونه جتنا نيلة فى حظنا الهباب .. شوفى ياستى .. أيام
 تغليسة السيد أبوالوفا اتلمت كفرسين لأول مره فى
 تاريخها ولمت له بالقرش والمليم .
 أبوالوفا وخلصونى من برائن التاجر اليهودى اللى كان
 مداينى بالريا وعاييز ياكل لحمى حى ..
 عجائب ياه .. ده إنت أتاريك قاسيت زينا ياعم الشيخ واللى
 يشوفك يقول ياما هنا ياما هناك .. صحيح الهدوم
 بتدارى كتير
 أبوالوفا شفتى إزاي .. أنا يابنتى لو قضيت العمر أسدد
 الدين اللى فى رقبتي لأهل بلدى العمر بحاله
 مايكفيش .
 عجائب تسلم وتعيش .. لكن لا الدين بيرجع لصحابه ولا
 المعونة بتوصلها
 أبوالوفا أمال بتروح فين يا عجائب؟
 عجائب وأنا ايش عرفنى ياحلوانى .. إسأل القط اللى إنت
 ممسكه مفتاح الكرار
 أبوالوفا لكن هما بيقلوا ان انتى يعنى .. يعنى ..

- عجائب يعنى إيه؟ .. ماتكمل ..
- أبو الوفا ماتزعلش م الصراحه؟
- عجائب اللي يزعل نسلخ وشه ياحلوانى
- أبو الوفا طيب ممكن تسيينا شويه ياكمنه
- عجائب لأ يا حبيبي ما يسييناش - قال الزرع أخضر والناس
أخبر واللى بيزمر ياروحى ما بيغطيش دقنه .
- كمنه (يضحك) البت دى مركبه بدل لسانها فرقله
- عجائب فرقله لما تبقى تلف على رقبتك تاخذ أجلك .. اسم
الله على بقك انت اللي بينقظ عسل .
- أبو الوفا الحقيقة انتو لتنين ماتتخبروش عن بعض .. يعنى
فوله وانقسمت نصين
- عجائب تعيش وتسلم دا بس من أصلاك
- أبو الوفا انما انتى راضيه عن حالك ياست عجائب
- عجائب نحمده ع اللي يجيبه
- كمنه أهو ده اللي جايب لنا الكافية ياحلوانى
- أبو الوفا بيقولوا ان الدعم بيوصل للناس لكن مافيش بركه
بسبب الفساد اللي بتنشره
- عجائب امشى اتنشر لحمهم ع السكك .. أنا صحيح باشتغل
فى الهشك هشك .. لكن لا عمرى أذيت غفلان
ولا افتريت على ضعيف ولا سرقت قوت محتاج

ولا كذبت ولا خنت أمانه الدور والباقي ع اللى ...

أبو الوفا
ماتكمليش .. ايه رأيك لو نبطل حجتهم وتسيبك
انتي من شغلة الـ

عجائب
هشك هشك مش كده؟ وأعيش منين واكل الجرمق
اللى ورايا ده منين؟

أبو الوفا
اللقمه الحلال موجوده فى كل زمان ومكان

عجائب
ياخويا ايدى على كتفك .. بس ازاي؟
أبو الوفا
احول لك جزء من المعونه وتفتحى بيه
سوبرماركت

عجائب
ياندامتى وأنا ايش فهمنى فى السوبر مارك ده؟
كمنونه
ياعم شوف لها شغلانه ايزى ايزى - شركة
توظيف أموال .. عمارتين ثلاثه أربعة خمسة ستة
سبعه ثمانيه تسعه عشره تمليك .. اعمل لها فيلا
بحمام سباحه وحط لها قرشين فى البنك تاكل من
ريعهم .. حاجات من النوع دا يعنى انت مش لك
عليها التوبه وخلص؟

أبو الوفا
التوبه لو حدها مش كفايه ياكمنونه - لازم عمل خير
يكفر عن الماضى .

كمنونه
طب ايه بقى الفرق بين السوبر ماركت وشركة
توظيف الأموال؟

أبو الوفا	نفس الفرق اللي بين الشاهيندر والشاهمنصر
عجائب	سامع الزيد ياخشى؟ قول كمان ياعم
أبو الوفا	فى السوبر ماركت يا عجائب حتتحكمى فى القوت
عجائب	الضرورى للناس. وهو دا الامتحان
أبو الوفا	والنبي كلام مايتعيب أبداً
كمونه	بس المسأله محتاجه ضمان يا عجائب
أبو الوفا	أنا ضامن بريقبتى
عجائب	(ضاحكاً) غراب ضمن حدايه.. لامؤاخذه
كمونه	يا عجائب القافيه ماتعذرش
أبو الوفا	لآ خذ راحتك يا مولانا
عجائب	والعمل يا حلوانى؟
أبو الوفا	عجائب هى اللي تضمن نفسها بكلمة شرف..
عجائب	تقدرى يا عجائب؟
أبو الوفا	رينا يقدرنى يا مشيخه
عجائب	لوحدك؟
عجائب	لوحدى طبعاً.. وامال ح اعمل جمعية؟ (يظهر
كمونه	التردد على أبو الوفا) ايه - انت حتحمرق؟
عجائب	دى تقدر على كتير قوى.. بس لو حبت.. دى
أبو الوفا	عجائب يا حلوانى. عجاااايب
	تعاهدينى يا عجائب

أعاهدك يا عمنا	عجائب
طيب هاتى ايدك وقولى ورايا (يتصافحان) شوفى	أبو الوفا
يا بنتى	
شايه يا بابا	عجائب
أهل الخير فى بلادكو غلابه	أبو الوفا
غابه يا بابا.. هو الخير بيعيش فى الغابه؟	عجائب
أيوه ان عاش فى قلوب الناس.. واللى ف قلب	أبو الوفا
الناس وناس	
اللهم الطف بالناس من شر القلب الخناس	كمونه
قولى يا بنتى.. عهد الله وعهد الأبرار	أبو الوفا
عهد الله وعهد الأبرار	عجائب
واللى يخون حيروح النار	أبو الوفا
واللى يخون حيروح النار	عجائب
لا تجورى لا دنيا ولا دين	أبو الوفا
ولا أجور ولا دنيا ولا دين	عجائب
وتراعى الناس العايزين	أبو الوفا
وأراعى الناس العايزين	عجائب
الشأى مش تلتينه نشاره	أبو الوفا
الشأى مش تلتينه نشاره	عجائب
والعيش مش مضروب بحجاره	أبو الوفا

والعيش مش مضروب بحجاره	عجائب
والزيت .. مش زيت عربيات	أبو الوفا
والزيت مش زيت عربيات	عجائب
والبولوبيف مش كلب ومات	أبو الوفا
والبولوبيف مش كلب ومات	عجائب
والبيع مش بره التسعيره	أبو الوفا
والبيع مش بره التسعيره	عجائب
البيع مش بره التسعيره	أبو الوفا
البيع مش بره التسعيره	عجائب
عهد يابنتى	أبو الوفا
عهد يابابا	عجائب
قولى أمين	أبو الوفا
قلت أمين	عجائب
اللهم اشهد واعين	أبو الوفا
اللهم اشهد واعين	عجائب
اللهم اشهد واعين	كمونه

أول أيام السویر مارکت (سویر مارکت الناس)

استعراض غنائی راقص بالسلع

بین عجایب والمجموعة

من ده بکره بقـرشین

زی إمـبـارح بقـرشین

عند عجایب بقـرشین

لقمه هنیه ورزق حلال

یا ابو العیال هات لك شیال

سایح نایح بقـرشین

جی ورایح بقـرشین

بابا قاللی صومی وصلی

وبیعى تملى بالقـرشین

ومن ده بکره بقـرشین

عهد الفقرا وعهد الجوع

مانبیع البیع الممنوع

ولا یدخل قوت المجموع

ف جراب البغل أبو کرشین

بابا قاللی صومی وصلی

وبیعى تملى بالقـرشین

ومن ده بکره بقـرشین

السوبر ماركت

مسعده
(تقوم بتنفيض وترتيب البضاعه على الأرفف
وهي تغنى بتهكم، بابا قال للى .. صومى وصلى
ويبعى تملى بالقرشين .. ومن دا بكره .. وشويش
ياعجايب .. يامورياهم العجايب .. صحيح ياما
تحت الساهى دواهى .. الله يرحمك يامه ويفشفش
الدبشه اللى فوق دماغك .

عجايب
جرى لك إيه ياللى تنشكى فى أمعائك .. انتى
يابت بتكلمى نفسك ؟ جرى لك إيه يابت مسعده ؟

مسعده
جرالى ما جرالى أنا الحبيب فى بالى وهو قلبه
خالى مع انى بنت خالته وحماتى بنت خالى ..
وكله اتلخبط على كله وان قلت مافيش اللى
تقول له .. وعجبنى عليك يازمن بوشين ومن

دا بكره بقرشين .

عجائب ياختى ربنا يحظك كمان وكمان .

مسعده محظوظه وخايفه يا عجائب .. خايفه عليكى
منك .. وخايفه بالقوى .

عجائب أبووااه .. دخلنا فى الغريق . نعم يام قويق .

مسعده انتى حره ياختى .. عقلك فى راسك واعرفى
خلاصك .

عجائب عارفاه .. استريحتى ؟

مسعده اقطع دراعى من تحت باطى لو كنتى تعرفى ..

ظظ من سبحان الله .. دانتى موكوسه والقطه تاكل
عشاكى .. داسوق يا عجائب مش كباريه .. هناك
كان فيه هشك هشك ورقصنى يا حنفى .. لكن هنا
بقى أكلك منين يابطة .. واحنا يابنت الناس
ما فيناش لحم لنياىب الدياته وخرايبش التعالب .

عجائب هاتى م الآخر يامسعه .

مسعده عبارة البيع بالتسعيره وانك تبيعى أرخص م

السوق وتكسبى قليل كل ده حيفتح علينا نار جهنم
واحنا مش حمل حاجه .. طاوعينى يا عجائب إحنا
مش متشوقين لامبارح وعايزينه يرجع .

عجائب يابت أنا مش قابله لك أنا واخده عهد على

صاحب المال إن مافيش خيط فى ابره حيخرج
من هنا إلا بالتسعيرة والبركه فى الريح الحلال.
طب قوليلى ياأختى.. هو الراجل صاحب المال ده
يقدر يحميننا.. لو مثلا يعنى..

مسعده

مافيش حد بيحمى حد.. الناس هما اللى يقدرؤا
يحمؤا أى شىء جميل فى حياتهم ويحافظؤا عليه.
(يدخل كمونه فى شبه مظاهره يحملون البضائع
وبعضهم يحمل صور عجائب)

عجائب

ياسو

كمونه

ياسو

الجميع

وعزولنا مدلدل

كمونه

راسه

الجميع

ياسو

كمونه

ياسو

الجميع

واحد فقير بعد عذابه

كمونه

والفقر عشش على بابه

سأل قالوله على عجائب

ونهر بستانها السايب

راح الفقير وهير نايب

والدعم روح لصحابه

والدعم روح

لصحابه

الجميع

أما البعيد مصاص الدم

كمونه

قاعد ينش وراكبه الهم

هربوا الزياين من غشه

وحاله باين على وشه

ويكره تغليسه تحشه

والدعم يرجع لصحابه .. والدعم يرجع لصحابه

(يدخلون البضاعة فى السوبر ماركت)

الجميع

كله بينش يا عجائب .. من أول سوق الشحاتين

كمونه

لغاية محلات أبوصفيحه واجنس الحديدى

والتغليسه والشمع الأحمر حيكونوا من نصيبيهم عن

قريب بإذن واحد أحد.

ودا إيه اللى فى العلب دى.

عجائب

أعشاب لزوم فرع العطاره.

كمونه

أعشاب إزاي يعنى.

عجائب

انتى ماسمعتيش عن طب الأعشاب .. دا هو

كمونه

الموضه دلوقتى.

انتو حتقلبوها أرزخانه.

مسعده

حتقلبها كله يامسعده.

كمونه

مجايب
كمونه
عجايب
البضاعة.. عشان خاطرى.

كمونه
بس كده.. أنا باحسبك حتقولى هات لبن العصفور
ياكمونه.. الحس السما بلسانك ياكمونه.. اخلع
عنيك وهاتهم ياكمونه.. انتحر ياكمونه.
(تحدث حركه بيع مجموعه على موسيقى من دا
بكره بقرشين).

زبون
مسعده
فيه عدس
عدس ورز وبصل وقول وفاصوليا خضرا وناشفه
ولوبيا وجبنه رومى واستامبولى وحلاوه وبسطرمة
وطرشى وقطن طبى ومستكه وحبهان ولبان دكر
ونتايه وشيخ وبطارخ وعصير فواكه و
الزبون
جرى ايه ياويله انتى!.. انتى مركبه مدفع رشاش
فى بقك؟

مسعده
يوه ياندامتى. مش باقظمك يابيه ع الموجود واللى
مش موجود.. ولا يعنى الحق على ولا الحق على
يعنى.

- الزبون (صارخاً) خلاص خلاص .. ياساتر دانتي حقته .
- عجائب (للزبون) أوامرك يابيه .
- الزبون فيه عدس مستورد .
- عجائب مسـ إيه ياخويا!؟
- الزبون مستورد.. انتى حتعلمى معايا علاقه ولا إيه .
- مسعده العدس يابيه (تناوله الكيس) .
- الزبون بكام؟
- عجائب (تمد يدها على الكيس) ورينى كده يابيه .
- الزبون (يبعد يدها بخشونة) إوعى إيدك .. أوريكى إيه؟
- انتى حتخترعى الذرة! ماهو سعره معروف زى ورقة البوسته اثنين جنيه .
- عجائب لأ يابيه .. الكيس دا بجنيه .
- الزبون ليه؟ حتبقششى على .. ولا بترسمى على تقيل ..
- ما انا عارف صنفكم دا كويس .. كلكوا طمعانين فى صحتى .. لكن دا بعدكو .
- عجائب وليه بقى الكلام الخايب دا .
- الزبون انتى حتتحققى معايا؟ خدى العدس مش عايزه ..
- البلد باظت يا جدعان (ينصرف) .
- مسعده روح إلهى يجى لك عطل فنى فى بنطلونك .
- عجائب (تقلده) كلكو طمعانين فى صحتى .

سعدہ ۰
ولسه ياما تشوفى م العهد والتسعيره .. دى ناس
زى القلط ماتحبش إلا خناقها.

كمونه
خصوصاً بتوع المستورد وعقدة الخواجه .. مره
واحد سألتنى على .. حنتيت مستورد

عجائب
ياولاد الكااللب... نص تمن قدح عدس باتنين
جنيه ومستورد كمان .. والنبي صدق الزيون ..
البلد باظت ياجدعان.

فارس
(يظهر أمام السوبر ماركت مستغرقاً فى نفسه رغم
ضجه البيع. عجائب تنجذب نحوه عند بدء
موسيقى الأغنية فيلاحظها كمونه ويقف فى
طريقها فتزيحه بخشونه وتتجه نحو فارس).

كمونه
(يكلم نفسه) يا عينى عليك يا كمونه وعلى بختك
المايل .. صحيح صدق اللى قال ناس لها بخت
وناس لها بدنجان .. اخص عليكى يا عجائب ..
بقى عنيكى دى كلها ومش قادره تشوفى الذهب م
الصفيح.

فارس
يغنى سايق عليكو النبى.

«سايق عليكوا النبى»

سايق عليكو النبى يامطيرين صيطى
لا بحرکم ملعبى ولا برکم بيتى
أنا منزلى ف السما بين النجوم ربما

المجموعه وايماء سهم اترمي مايجيب أساس حيطى
 طائر ياسواد العين طائر طائر على فين
 فارس طائر تلحق مواعيد طائر والسكه بعيد
 باحلم بكبشة نجوم وارميها فوق الغيوم

تشرب حليب صافى

يروى فتفرش ربيع سجاد منمنم بديع
 وامشى عليه حافى المجموعه

طائر على شوق موال طائر والليل أهوال
 فارس طائر والناس ومجاريح طائر على عكس الريح
 ونص كبشة نجوم أبدرها وأقعد وأقوم

تطلع قصور شاهقه

مسحوره فيها الجوارى تشبه بنات الحوارى
 ف الضحكه والشهقه المجموعه

طائر بجناح الغير طائر ياقليل الخير
 فارس طائر بجناح الخوف طائر ياعديم الشوف
 وربع كبشة نجوم علشان لزوم اللزوم

ترقص على كتافى

يا أرض واتهدى ما عليكى من قدى
 قادر ومتعافى المجموعه

طائر على حلم بالون طائر ولاصوت ولالون
 فارس طائر يابن المجانين طائر وفايتنا لمين
 يامعطلين مأرى ومطيرين صيطى
 لا بحرکم ملعبى ولا برکم بيىتى

ولا أرضكم مطلبى ولا حلمكم غيظى
سابق عليكم النبي لتبحبوا خيظى

عجائب

(بعد انتهاء فارس من الغناء) اتفضل يا كابتن.

فارس

(لا يعيرها التفاتاً)

عجائب

يا عم رد علينا وخذ عنيئا - يا سيدى كفاياك تقل

بقى

فارس

إيه .. فيه إيه .. هى الحكايه ناقصاكى؟

عجائب

يوه .. يا نداشتى .. باقولك آنسنا ونورتنا .. مش

يمكن تشتري

فارس

ما باشتريش .. إرتحتى؟

عجائب

ياسيدى اللى ما يشتري يتفرج ..

فارس

(ينصرف دون أن يعيرها التفاتاً)

عجائب

روح الهى يفرسك زى ما انت فارسنى يا فارس

يا ابن أم فارس ..

كمونه

(يظهر فجأه) ناس فارسه ناس ومفروسين من

ناس وذناب ناس بيخلص من ناس.

عجائب

والنبي تتنيل على حكمك اللى مش جايبه همها

كمونه

يابنت الناس انتى منشه غلط

عجائب

بأحلم ياكمونه .. هو الحلم فيه صح وغلط؟

كمونه

ياخوفى يا عجائب ليطلع كابوس

عجائب

يطلع زى ما يطلع .. إطلع إنت بره الحلم وسيبنى فيه

كمونه

طلعت يا عجائب .. احلمى بقى لما تشبعى ..

عجائب

ومين قال لك ان الحلم بيثبع .. الحلم يامخشمون

بينوس .. وأنا عايزه أتونس .. عندك مانع؟

(تدخل إمرأه بلدى ومعها ولداه خيشه والشحات

وأبوالشحات)

المرأه

دستور يا أهل المطرح .. صلاة النبى سابقانى

ولاحقانى .. شيللاه يا أهل الله - مدد يا عدوى

(ترى عجائب) يا أختى اسم النبى حارسك

وضامتك .. هى يا أبوالشحات .. هى بعينها

عجائب .. اخص عليكى يا وحشه يا أم قلب

قاسى .. كده برضه قوام تنسى العشره والعيش

والمح؟

عجائب

مين؟ .. خالتى أم الشحات (تحتضنها) أهلاً أهلاً ..

خطوه عزيزه .. وشك ولا القمر .. إزيك يا واد

يا فرشه ..

خيشه

خيشه يا أبليتى .. خيشه

مسعده

عاشت المماسح ياروح خالتك

خيشه

الوليه دى أرمله يا أبليتى؟

مسعده

أم الشحات إمشى .. إن شا الله أمك .

خش يابو الشحات .. تعالى ياواد يا شحات أبلتك
عايزه تشوفك .

(يدخل شاب يرتدى ملابس قديمه ولكنها نظيفة
ويحمل حقيبته يسلم على عجائب ومسعده وكمونه
عجائب باحترام) .

أم الشحات إزيك يا شحات .

يسلم زيك ياختى .. خايب ونايب ومش باين له
الشحات فى الحب نايب .

(يحتضن أمه بحنان) انتى بس ترضى على

أم الشحات ياست الحبايب وكل شىء حبيبقى تمام .

يرضىكى يا عجائب يا بنتى لا عايز يشتغل مع أبوه
كمونه فى الأونطه ولا راضى يسرح مع أخوه يلقط رزقه
انتى عايزه تشغيله حرامى (يتأمل اشحات) أنا ياد

الشحات شفتك فين قبل كده ؟

كمونه لازم فى التليفزيون

الشحات لاسود ولا الملون يا روح أمك ؟

ما فيش داعى للغلط عشان ما أهزأكش وانت راجل

كمونه كبير .

(يخنق الشحات بياقة قميصه ويزنقه ع الحيط)

عجائب تهزأ مين ياد يابن أم أريعه وأربعين انت .

كمنونه (تتدخل بسرعه) استنى بس ياكمنونه بتعمل إيه؟

أم الشحات واد طيب وابن حلال .

كمنونه (يترك ياقه القميص) لا ما هو باين ابن حلال

أم الشحات مصفى .

مسعده جرى إيه يا حاج ماتلم الأتك ياخويا شويه وبالزاحه

عجائب علينا ولا يعنى الغلابه مالهمش ضهر فى البلد

الشحات دى؟

كمنونه شوف ياخويا السهوكه بتاعة المرا؟

عجائب خلاص يامسعه .. طفوها استريحى أنتى بس .

كمنونه (لكمنونه) انت بتتمد إيدك على؟

الشحات (متذكراً) آه .. أنا شفتك عند محلات السعدان ..

كمنونه بس مش فاكر جوا ولا بره .. صح؟

عجائب صح .. آدى احنا طلعنا بلديات أهه .

الشحات إنما جوا ولا بره .

كمنونه ياسيدى ما أنا ح أرسيك على كل حاجه بس مش

عجائب وقته .

كمنونه ووقته دا امتى؟

عجائب لينا قعده ياعم كمنونه .

كمنونه طب ماتيالاً بينا نروح القهوه نضرب لنا اتنين

الشحات شأى ونرص اتنين صاحبه .
كمونه أنا مابحبش قعدة القهوه .

أمال بتقعد فين؟ فى الهيلتون .. (يجذبه) تعالى
هنا .. رايح فين (تسقط رصة كتب من يد
الشحات) إيه ده؟ (ينحنى كمونه ع الكتب
ويلتقطتها من الأرض ويقرأ بصوت عالى) اللص
والكلاب؟ الأم! الفتنة الكبرى! اللجنه! انت سارق
الكتب دى مدين ياد.

الشحات الشحات الكتب؟
يا عم سارق إيه ومهيبب إيه .. وانت إيش فهمك فى

ياخويا ما تحل عن الواد بقى .. هو قدك .. روح
الشحات ياواد يا شحات شوف اختك زمان الحصة خلصت .
كمونه (ينقلت من كمونه بعد ما يستولى على الكتب الى
خارج السوبر ماركت) .

أم الشحات (يجرى خلفه) وحياة أمك ما حسيبك إلا أما أجييب
أم الشحات قرارك .

عجايب الحقى ياست عجايب ليعمل فى الواد حاجه .

أم الشحات ماتخافيش يام الشحات .. دابيهزروا .
ياختى صدق اللى قال .. صحيح ما محبه إلا بعد
عجايب عداوه .

مسعده انت لسه بتمكس ياواد ياخيشه .

أم الشحات هو بسلامته سرنجاوی؟

اسم النبی حارسه وضریب وشداد ومنزولجی
وبرشامجی وبلبوعجی وأفیونجی وابن کبایه کمان
وبعد ماتسلمی علیه لازم تعدی صوابعک العشره .

مسعده

أم الشحات بسم الله ما شاء الله .. عینی عليك بارده .

یاختی النهارده الخمیس الله أكبر .. خش یازینهم ..
یابت یاجمالات یابو عربی .. خش یاواد
یاعربی .. یابت یاکیداهم .. تعالی یابو نعمده ..
خش یاخویا الدار أمان .

مسعده

بسم الله الحفیظ دی عاصفة الصحراء .. مین دول
یامقصوفة الرقبه یاموکوسه مش تعرفینا ع الناس
أم الشحات الحلوه دی؟

وحتعرفک علینا بتاع ایه یاحبیبیتی .. وعایزه
تعرفی عننا ایه بالضبط .

مسعده

انتی یارلیه حتشلقی لی؟ باسأل .. هو السؤال
أم الشحات حرم؟

لأ یاحبیبیتی .. اقعدی عوجه وانکلمی عدل .. احنا
معروف أصلنا وفصلنا الدور والباقی بقی .. ع اللی
مش معروف لهم أصل من فصل .

مسعده

ينيلك مره .. انتى بتقولى شكل للبيع مين دى

عجائب يا عجائب .

مسعده دى خالتك أم الشحات .

أم الشحات بالنسبه لايه يعنى ؟

عجائب شوفى أما أقولك ياشابه .

ياجماعه صلوا ع النبى .. دى خالتك أم الشحات

أم الشحات صاحبة أول مطرح سكتته فيكى ياكفرسين .

فى حبة نن عين خالتك من جوا .. لاكلتى حرف

ولا نمتى طرف ميه وعشرين يوم صباح يفارق

مسعده مسا ومسا يقابل صباح وانتى الليه والعين الجوانيه

عجائب وبعد الميه وعشرين يوم .

مسعده خلصت فلوسك ياخواجه .

عجائب فقالولك أبوقرش ينزل هنا .

أم الشحات ودلقونى

ياختى حدا الله بسيفين وعلى ابن عليم ماخليت

خرم إيبره فيكى ياكفرسين إلا أما نكشته .. انتى

عجائب ياختى اللى فص ملح وداب .

ولا يهملك .. انتى ايه أخبارك .. والدنيا عامله إيه

أم الشحات معاكى .

(تنفجر باكيه) . أقولك إيه وأعيدلك إيه يا عجائب

يابنتى.. الشكوى لغير الله مذله والسؤال لأهل
 البصيره عيب.. إنتى عارفة عمك أبوالشحات
 مدهول على عينه لا بيثيل ولا بيحط.. والواد
 جوز جمالات أهو مرمى بطل وراكز على قلبى
 بمراته وعياله.. والشحات أديكى عارفاه مخبوط
 فى عقله.. رايح يدور ع الشرف عند السعدان
 ومقصوف الرقبه خيشه خايب ونايب وكل العبر
 فيه واللى بيسرقه ما بيكفيش دخان وطول النهار
 على هاتى يامه هاتى يامه لما نحننى.. واللى
 زاد وغطى حتة الربع اللى كان متاويننا اتشرخ فى
 الزنزال وجت له الازاله وحيبنوا مطرحه أكانده
 تسع نجوم سياحه.. وادينى بقيت ياختى ع الحميد
 المجيد لا لقمه ولا هدمه ولا متوى أنا والجرمق
 اللى ف رقبتي لحد ياختى ما سمعت بعبارة
 السوبرمارك قلت آجى آهنى واتكل على الله.

مسعده

أم الشحات يابنت الأرندى! داننى أتاريكى مكنه فى الكذب.

عجايب ياختى قولى كلمه تفعدلك ياشابه.

مسعده يابت يامسعه حرام عليكى

عجايب ياختى حرمت عليكى عشتك ياصدمانه ياندمانه

أنا عارفه انها مره كدابه وقويه.. لكن الجوع أقوى

يامسعه.. ولا انتى نسيتى الجوع؟ خلاص يام

الشحات.. اعتبرى هنا بيتك لحد مارينا يدبرها.

مسعه

يالهوتينى.. وحياة أمك لو خشوا هنا ما هم طالعين

أم الشحات ولا بالطبل البلدى

خش ياشعبان - ياواد يامليم - يابت يانحمده يابت

هاتى جوزك وبتتك وخشى ياواد ياكركور تعال

أبونحمده ياللى تتضرب فى راس قلبك.

أم الشحات نخش ياحماتى؟ ياساتر

خش ياعين حماتك.. بسلامته جوز نحمده ياست

عجايب.. اوعى ياختى نكون حنتقل عليكى ولا

مسعه حاجه.

عجايب لآ العفو.. داننو حتفطسوها بس.

لا يا أم الشحات.. استنى بس على أفضى لكوحته

أم الشحات فى المخزن تناموا فيها لحد ما يفرجها رينا.

يابت ياكيداهم.. البت راحت فين؟ ياواد ياخيشه..

خيشه فين اختك ياللى تنتشك فى مصارينك.

يعنى انتى مش عارفه هى فين دلوقتى؟ ولا

أم الشحات عايزانى أروح أجيبها لك م الزمالك

طب اكنتم اتكتمت فى قلبك.. اشاعات والنبي

ياعجايب يابنتى.. البت ياعين أمها كل ليله تروح

تمقق عينيها في المذاكره مع الطلبة العرب في
الزمالك .. كل ليله .

مسعده ويتسقط كل تسع شهر..

عجائب (تضحك) الله يخرب بيتك يامسعده - يابت

ماتبقيش قاسيه كده

مسعده أنا برضه اللي قاسيه ياعجائب؟ وانتي اللي

بتقوليها بلسانك - اشحال لو ما كنتش طاحنه الهم

معاكى وسفاه .

عجائب أديكى قلتها ببقك ياعين أمك

زبون كيس عدس من أبوجنيه وأربع حتت صابون وش

وعلبتين صلصه

عجائب (تذهب لاحضار المطلوب)

أم الشحات يامسهل .. يجعل وشنا نادى عليكى بحق جاه

النبي

مسعده ولا نادى ولا مقنذل .. دى بسلامتها بتبيع

بالخسارة

أم الشحات ليه ياختى كفى الله الشر

مسعده قال ايه واخده عهد ماتبيعش إلا بالتسعيره

أم الشحات تسعيره! الشر برا وبعيد .. دى كانت تبقى ميله

الزبون (لعجائب) تصورى؟ أخويا مش مصدق الأخبار

ده أنا ح أجيبه هنا يشوف بعينه .
 عجائب أهلاً وسهلاً المطرح مطرحك .. واحنا هنا
 مخصص عشان خدمة الناس
 الزبون طب انتو حتفضلوا فاتحين لامتى
 عجائب قدامك لبعده صلاة العشا . مع السلامة (يخرج
 الزبون وتعود عجائب)
 أم الشحات حقّه الكلام دا صحيح يا عجائب يا بنتى
 عجائب (تنظر لمسعده بغيظ) كلام ايه يا خالتي
 أم الشحات قال بتبيعي بالتسعيره واللى ماشفر بيجر
 ع التباشيره
 عجائب ودى فيها ايه يا أم الشحات؟
 أم الشحات فيها كتير قوى يا عجائب .. دانتي ما تلاحقش
 عجائب ياناس الرحمه حلوه .. شايفه الناس اللى ماشيه فى
 الشارع دى .. ماشيين حلاوة روح . يعنى ميتين .
 والضرب فى الميت حرام
 أم الشحات ياختى يسلم بقك .. لكن يعنى عبارة التسعيره دى
 ضرورى ضرورى يعنى
 عجائب شوفى انتى بقى يام الشحات .. ياجعانه يا غلبانه
 يامغبونه يا صاحبة العيال شوفى وقوليلى .. نورينى
 الله ينور هالك .

أم الشحات أنا باقول يعنى كنتى تخليكى تحت الحراميه وفوق التسعييره .

مسعده هو كده تمام تحت الحراميه وفوق التسعييره .

عجايب سندوتش يعنى .. مش كده .. فى النص

أم الشحات اسم الله عليكى .. هو كده بالضبط

عجايب حتى انتى كمان يام الشحات منشنه ع النص

مسعده وهو النص ماله

عجايب ما مالوش يامسعده .. النص يا حماره يعنى الرقص

ع السلم لا اللى فوق يسمع ولا اللى تحت يشوف ..

لا ياستى يفتح الله .. أنا واخذه عهد مش نص

أم الشحات يابنتى مايقدر ع قدره إلا الله .. هو انتى لو

حافظتى على نص عهدك يبقى وحش؟

عجايب (تضحك بمراره) شفتى ازاي! أول ما نبتدى

نخون بنكون مجهزين التبرير اللى يزوق الخيانة

ويخفى بشاعتها .. نص العمى ولا العمى كله ..

لا عور أحسن م لا عمى لا عرج أحسن م المكسح ..

حافظى على نص عهدك . يام الشحات يعنى

خونى نص عهدك .. لا يام الشحات يانبقى واحد

ياإما ما نبقاش خالص أحسن .. لكن النص

عجايب (تغنى) قطع النص

وعيشة النص
ولا بيرقع
ولا بيقص
آه يازمان
يابو نص لسان
كدبك نص
وصدقك نص
ورميت نصك ع الانسان
إتنصنص
بقي نص ونص
ولا مستقنع
ولا غضبان
ولا شواق
يحلم ويبص
ولا مستريح
ولا خسران
ولا بيقادى
ولا بيطس
بيقى داعايش
روح وكيان

ولا شبح مبتور النص

قطع النص

وعيشة النص

اجتماع التجار

(قاعة اجتماعات مليئه بالتجار بينما المنصه خاليه والتجار يثرثرون)

دا يبقى اسمه خراب مسجوده

السعدان

والله عال يا كفرسين .. أصلك عيره وفصلك عيره

وعايزه تعيش بالتسعيره ما هو ذا الزمن اللي

وصى عليه حسان .. الله يرحمك يا حسان

حسان مين يا جدع؟ هو انت على طول كده فى

الحديدي

الضياح ماتفوق بقى يالازق

ومش فارسنى ومطلع النجيل لاخضر على عينه

السعدان

إلا شوية الزباله اللي واقفين لها طوابير طوابير

واللى زاد وغطى قفلت الكباريه وبننت مطرحه

السوبر ماركت طيب نروح احنا فين بقى؟

على كده فين الحكومه ياجدعان
الحديدي ماتسكت انت شويه
السعدان هو أنا كل ماأجى اتكلم تزرع فى؟
تاجر ما انت ما بتعرفش تتكلم
السعدان البركة فيك انت يا معلمه
الحديدي بس يا عيل انت وهو.. الراجل وصل
المذيع مولانا سيد السوق وحامى حمى التجاره والتجار
شاهبندر شرف البرين والبحرين رئيس مجلس
محلى كفرسين المعظم (تصفيق) يامحلى ديل
العصفوره وبلدنا طالعه فى الصوره.
رئيس (يدخل فيقف الجميع مصفقين فيرد تحيتهم ثم
المجلس يشير لهم بالجلوس فيجلسون) الحمد لله.. باسط
الأرض ورافع السماء.. ولا حول ولا قوة إلا
بالله.. يهب الملك لمن يشاء.. والصلاة والسلام
على رسول الله.. حرم الربا وأحل البيع والشراء
أما بعد.. أنا مش فاهم حاجه من أصله إيه اللى
داير فى الكفر من ورايا؟
السعدان البت عامله ازعرينا فى السوق ياباشا. ومن يوم ما
فتحت واحنا قاعدين ننش واذا استمر الحال على
كده حنروح كلنا فى الكازوزه يعنى حنضرب

تفليسه يرضيك يا باشا؟ (يقف وينزل من المنصه)
اسكت ياسعدان.. اسكت بأقولك - شيء غريب..
ماتيجوا تحكموها انتوا.

الرئيس

(يهتفون هتاف موقع) العفو يا باشا. حاشا على
حاشا.. يا صاحب الكلام.. قدنا الى الأمام.. انت
اللى أكلت الجو والشجر ينجرو
(تصفيق حاد)

الجميع

(منتشياً) سمعت يالازق.. طول عمرك غبى
ومتسرع وحمار

الرئيس

جمع فأوعى يا باشا (ضحكات)
التجاره يا أولادى زى ما علمتكم هى مهنة
الشطاره.. هى مهنة إيه؟

الحديدى

الرئيس

الشطارة يا باشا

الجميع

الشطاره يا باشا.. الله يفتح عليكم.. والشطاره
يا اولادى مش عايزه شطاره.. اقنع الزبون بن
الشارى كسبان والبائع

الرئيس

خسران يا باشا

الجميع

عفرام عليكم.. فيه يا ولاد حكمه قديمه بتقول
الوقت كالسيف إن لم تقطعه

الرئيس

قطعك يا باشا

الجميع

الرئيس أنا امبارح بس الهمنى ربي فأدخلت على الحكمة
دى تعديل بسيط علشان تتمشى مع أوضاعنا
الحاليه

تاجر سبحان من ألهمك

تاجر يؤتى الحكمة من يشاء

الرئيس ما أخبش عليكم احنا بنمر بظروف صعبه
حبتين.. الراجل أبوالوفا الحلوانى اللى لحم كتافه
من خير كفرسين.. عايز يفلفص السنه دى ويفقع
زميه فى المعونه.. يعنى استندل بالعربى.. قال
ايه الدعم اللى بيبيعه لا يصل لمستحقه.. شىء
غريب! ما ان شا الله ما وصل.. ثم دى مسائل
داخليه وانا لن أسمح لأحد بالتدخل فى شئون الكفر
الداخلية.

أصوات الله أكبر.. ربنا يخليك للفكر يا حامي الفكر..
يا حبيب الشعب

الحديدى عاش الباشا حبيب الشعب
(يرددون خلفه)

الرئيس يرجع مرجوعنا للحكمه القديمه.. انا شلت كلمة
الوقت وخطيت كلمة الزبون بدلها

الحديدى ايه الحلاوه دى - سبحان من ألهمك - يسقط الوقت

ويحيا الزبون (ترد المجموعة).

الرئيس
السعدان
وشلت كلمة السيف وحطيت كلمة العمر بدلها
ياسلام.. علم الانسان ما لم يعلم.. دى جواهر
والله

الرئيس
اسمعوها كده يا اولادى.. طبعاً الضمير عايد هنا
على التاجر أيها التاجر الزبون كالعمر.. إن لم
تسرقه سرقك

(حالة من الهياج تشنجات وهتافات محمومه..
الله أكبر الله أكبر)

كمونه
الذى كان مندساً بينهم يسجل معلومات لصالح
عجائب يخونه حرصه فيرتفع صوته يكتب
العبرة) إن لم تسرقه سرقك

(يفاجأون بوجود كمونه بينهم فيتكالبون عليه)
الحديدى
لكمونه) المره دى مش حثفت من ايدى تانى
يا ابن الأبالسه..

الرئيس
ايه ده فيه ايه.. (ويعد أن يقبضوا على كمونه)
سيبه يا حديدى تعالى يا ولد هنا

كمونه
الحديدى
كده برضه يا باشا اتبهدل ف ضيافتك
دا يا باشا الواد اللى بيعكر صفو الأمن العام ويقود
المظاهرات ويحرض الناس على الشرا من السوير

ماركت بتاع المره .. ومقاطعة المحلات الثانية ..

بتاعتنا

الرئيس
الكلام دا صحيح يا ولد
الحديدى
صحيح يا باشا وسعادتك أصدرت أمر بالقبض
عليه

الرئيس
وماقبضتوش عليه ليه يا حديدى
كمونه
يا باشا سيك منه دا راجل حمار
الرئيس
(صارخاً) ولد.. إتأدب لأقطع لك لسانك
كمونه
يا باشا أنا من رجالتك وباشتغل تبع أم الشحات هو
اللى مش فاهم حاجه

الرئيس
(مندهشاً) إيه الحكايه .
السعدان
(يتجه الى المنصه ويهمس فى أذن الرئيس الذى
تبدو على ملامحه الدهشة ثم ينفجر ضاحكاً)

الرئيس
مدهش .. هو أنت بقى اللى بتعمل الـ
كمونه
أمال يا باشا (يغنى)

أنا الحكيم الحكمائى فيستحوذ على اعجاب الرئيس
الذى يردد خلفه الغناء ويشير بيديه للجميع وكأنه
مايسترو يقودهم فيغنون خلف كمونه

أنا الحكيم

أنا الحكيم الحكمائي نافوخى سبحان الباقي
وعشقى دائى وترياقى عطار وعائش بالعله

ياحلاوة الزين يامشالله وألف ماشا الله

علمت ايدى دق الهون علمت عينى دوق اللون
علمت قلبى يساع الكون وعشقت والعشق مذكه

ياحلاوة الزين يامشالله وألف ماشا الله

داعيكو كموه العطار حكيم محلك على منكرا
أهون على كى النار ولا زله تستوجب ذله

ياحلاوة الزين يامشالله وألف ماشا الله

ياطالب الطب بأعشاب قبل الدرا شوف الأسباب
لكل جرح بدايه وباب والعله نتجت عن عله

ياحلاوة الزين يامشالله وألف ماشا الله

مدينه طرحت أشواقها ما بين ايدين اللى سرقها
لو كان بايدى لاحرقها واكسب ثواب قولوا ان شالله

ياحلاوة الزين يامشالله وألف ماشا الله

الرئيس الولد ده مسلى.. الولد ده ضيفى النهارده

ياحديدى بمخلته.. فاهم

كموه أنا أنا يا باشا واحد من محاسيب محاسيبك

الرئيس انت ومخلتك

كمونه أنا ومخاتى .. وهذا من فضلى ربي .. من فضل
مين سعادتك .

الرئيس من فضل ربي

كمونه عفارم على سعادتك يا باشا يا بن الباشا .

الرئيس اختار ألفاظك يا ولد

كمونه وأنا بقى ياسيدى ربنا إدانى موهبه .. ومالك الملوك
إذا وهب

الرئيس لا تسألن عن السبب .

كمونه يا واد يا باشا بيشوانت يا صاحى والناس نايمين ..

والنبي انت خساره فى الكفر ده .

الحديدي نقى ألفاظك يا حمار وانت بتكلم الباشا .

الرئيس سيبه يا حديدي .. كمل يا ولد ربنا وهبك ايه .

كمونه التطلع يا حلاوه .. أنا يا باشا ممكن أفطر فول

وممكن ما أفطرش واتغدى جنبه قديمه وممكن ما

أتغدش لكن لازم أتعشى كل ليله .. أتعشى ايه

بقى ؟

الرئيس تتعشى ايه

كمونه لا قول انت

الرئيس انطق يا ولد تتعشى ايه

فاسوخة أتعشى تطلع

الرئيس

بسم الله ما شاء الله - الولد ده بي فكرنى بشبابى ..
اقعد يا ولد امشى اقعد ورا .. اسمعوا يا ولادى
عمكم الأخشم بن الأخنف الرقاص بيقول ايه فى
كتابه (المعين للمتلعين) اسمعوا كده .. (يرتل)
ولما كان شبل اليوم هو أسد الغد .. وقد وقد .. فانى
أوصيكم حملة الأرنب فى كل صوب وجانب
بأبنائكم المتلعين خيراً فإنهم ملح السوق وحداء
النوق وكلمة البشاره وحملة الإشاره وسدنة الإدارة
وحماء التجاره الى أن يرث الله الأرض ومن
عليها (وضجه شديده استحساناً لما قال .. الله
أكبر .. الله الله الله .. سبحان من علمك .. حلو
قوى والله .. هو حلو بعقل .. دى حاجة تخبل ..
على الطلاق ولا فوازير رمضان ..

الرئيس

شايقين ترائنا يا ولاد؟ قوم يجى النهارده سى
السعدان اللازق ويقولك البننت يا باشا .. باشة ايه
وزقت ايه .. ما تقرا ترائك ياسيدى وانت تفهم
المشكله يا ولادى مش فى البننت ولا فى المدعوقه
اللى اسمها التسعيره .. لأ أبداً.

أنا ح أقول لكم المشكله فين

(صارخاً) أنا جبت لك النبى سياقه تشرح كويس ..

كمونه

عايزين نفهم احنا حميرك يا باشا.

الرئيس انت يا واد مين أذنك تتكلم.

الحديدى أرميه بره يا باشا

كمونه بمخلتى

الرئيس لا سيبه يا حديدى.. امشى يا واد اتزرع ورا لحد

الجلسه ما تخلص ومش عايز أسمع نفسك.. أنا ح

أذيع سر ولأول مره أنتو مش غرب

الحديدى الولد ده غريب يا باشا

الرئيس قلت لك سيبه يا حديدى.. طلعه من دماغك

وسيبه.. أنا امبارح باراجع تقارير الأمن بنفسى

فاكتشفت ان أولادى نزلوا من ورايا وراحوا السوبر

ماركت بتاع اللى اسمها عجائب واشتروا بالتسعيره

مجموعات أتارى أتارى مراتى هى رخره راحت

قبلهم واشترت نداغه.

كمونه شوف دناوة النسوان ياجدع.

الرئيس اقعد ياولد.. يبقى البنت دى منعناها من دخول

بيوتنا أيام الهشك هشك تقوم تفتح السوبر ماركت

وتدخل بيوتنا سرقه.

تاجر كلنا مستعدين نخلصك منها يا باشا.

الرئيس بالقانون.

- الرجل القانون ١٠٣ يا باشا.. بتاع التسعيره .
- الرئيس ١٠٣ متفصل على مقاس اللي بيع باكثر من التسعيره وهى بتبيع بأقل أقعد يا حمار.
- تاجر فيه قوانين كتير تنطبق عليها يا باشا.
- الرئيس طب انت فاهم القانون يتطبق ازاي؟
- تاجر منك نستفيد يا باشا.
- كمونه أنا فاهم يا باشا.
- الرئيس طب قول انت يا فالح.
- كمونه أطبقه زى المنديل وأحطه فى جيبى وبعدين أتعايق بيه.
- الرئيس سقوا للولد ده .. الولد ده تاجر بالسليقة.
- تاجر دى عامله تجمهر ومعطلة حركة المرور يا باشا.
- الرئيس ودى أقصى عقوبه ليها ست اشهر.. مافيش فايده فيكم غلبت أطبع فيكم والطبع فيكم غالب وديل الـ ايه.
- الجميع الكلب يا باشا.
- الرئيس المسألة مش جهجهونى يا ولاد... السوق ده ربطه واللى يحاول يفك من الربطه دى.. يتعمل بسطرمه على طول ودى انا ح اربطها من وسطها زى النسناس.. وبالقانون برضه.. القانون اللي

وضعه ربنا قبل الانسان ما يفكر فى القوانين ..
القانون اللى كل الناس بيحبوا قسوته وينفذوه
بأمانه ولو على أنفسهم .. قانون الغرام .. التقارير
اللى جيه من مصادرنا الأمتيه فى السوير ماركت
تؤكد ان البنيت بتحب واد صايغ والواد ده يبقى
ابن أخت الباشا اللى كان بيقول البنيت يا باشا ..
سى السعدان اللازق .

السعدان
انا يا باشا؟

الرئيس
أيوه انت .. انت مش لك ابن اخت اسمه فارس .

السعدان
صحيح يا باشا .

الرئيس
وكنت مستنى ايه بسلامتك ما اتحركتش ليه هو

أنا ح أحرس الكفر لوحدى أأكلكوا وأشريكوا وأحمى
مصالحكوا وأجوزكوا وأطلقكوا وأنيمكوا وأقومكوا
وأراجع حساباتكم فى البنوك .. وانتو وذن من
طين والتانيه من عجيب ..

السعدان
ماكنتش أعرف يا باشا .

الرئيس
أديك عرفت .. تقنع الواد ابن اختك انه يتجوز

المره دى وتسيب الباقي على .. كده مضبوط .

الجميع
مضبوط يا باشا .

الرئيس
بيبدأ فى الرقص والغناء وهم يصفقون له ويرددون

الغناء خلفه .

الرئيس

كده مضبوط

وأنا مبسوط

والسايب ضرب المربوط .

يا سارح فى السوق دلال

فيش فى اللعب

حرام وحلال

فنفته يا عبدالعال

وتسلطن تكسب مضبوط

كده مضبوط

الجميع

وأنا مبسوط

والسايب ضرب المربوط

لعبتنا لعبة شطار

صنعتها إدين التجار

من لمسه تزيد الأسعار

والشارى يرقص مبسوط

الجميع

كده مضبوط

وأنا مبسوط

والسايب ضرب المربوط .

كموته (الذى كان يشاركهم الغناء والرقص يحاول

الانصراف)

الحديدى	(للجنود) امسكوه .
كمونه	فيه ايه تانى؟
الحديدى	فيه اللى سمعته وعرفته يعطار الزباله عايز تروح إزاي؟
كمونه	يعنى ايه .
الحديدى	يعنى حنتحفظ عليك فى مكان أمين .
كمونه	طب فين المخله .
الحديدى	المخله كمان حنتحفظ عليها فى مكان أمين .
كمونه	فين؟
الحديدى	فى حضن الباشا .
الباشا	كده مضبوط وأنا مبسوط والسايب ضرب المربوط .

فارس فى غية الحمام

غية حمام يقف فارس أمامها وعلى كتفيه تقف
مجموعه من الحمام ويمسك فى يده فردة حمام

يغنى لها

رفرف يامرسال الغرام

واقرد جناحك ع القمر

ويلغه عنى السلام

وقول له .. جاى لك ياقمر

ياسيدى جاى لك

ياروحى جاى لك

ياعينى جاى لك ياقمر

(يدخل السعدان دون أن يراه فارس)

إسم النبى حارسك وضامنك يابن نفيسه .

السعدان

- فارس ح إيه؟
- السعدان حتورث وحتورث مبلغ جامد.
- فارس ليه؟ إنت حتموت ياخالى؟
- السعدان جاك موته تاخذك واد قليل الحيا.
- فارس أمال ح أورث مين.
- السعدان مراتك يا أهبل يابن الأهبل.
- فارس ورينى عينك يالازق.. انت مبلغ حاجه؟
- (يجسه) ده إنت سخن قوى.
- السعدان شوف الواد المجرم.. ياواد خد الكلام للآخر
- ماتبقاش حمارزى أبوك الله يرحمه.. إنت
- حتتجوز.
- فارس حت أيه ياخويا
- السعدان حتتجوز.. ماتعرفش تتجوز كمان؟
- فارس انت بتخرف بتقول ايه.
- السعدان انى برضه اللي باخرف يابن نفيسه؟ إخص عليك
- وعلى ربايتك
- فارس ماتزعلش ياخالى. ما إنت كمان بتشرب صنف
- وسخ قوى ويتفضل تشرب لغاية ما تغيب عن
- وعيك وتخرف بقى.
- السعدان تانى!

فارس

لأ.. أنا لسه ماكملتش.. وماتاخذنيش فى دوكه
وقول لى إنكلمت إنت وأختك ولا لأ فى مصاريف
الكلية.

السعدان

ما إنت لو بتسمع للآخر كنت إرتحت وريحتنى.
أسمع إيه ياخالى؟ بقى أنا أكلمك فى مصاريف
الكلية تقوم إنت تستهبل وتجوزنى وتورثنى وأنا
معرفش.

فارس

السعدان

إنت مش عايز تبقى طيار؟
ولازم أبقى طيار.

فارس

السعدان

منين يا فالح!

فارس

أنا عارف إنك راجل جلدك وتموت ع السحتوت
وعشان كده أنا إتفقت أنا وأختك إن اللى
حتدفعهولى فى الكلية حنعتبره دين.

السعدان

ياواد السعد جاى لك من أوسع الأبواب.. عروسه
تحتكم لها على خمس ست أرناب وأكبر سوبر
ماركت فى الكفر.

فارس

إنت حتخش فى الدهمله تانى ياسعدان؟

السعدان

وعارف مين اللى خطبها لك؟ - الراجل الكبير
بذات نفسه.

فارس

راجل مين؟

- السعدان رئيس مجلس الكفر.
- فارس خطب لى مين؟
- السعدان عجائب.
- فارس عجائب الغزیه.
- السعدان ما بقتش غزیه ربنا تاب عليها و بقت من رجال الأعمال.
- فارس وإننت رأيك إيه؟
- السعدان ودى فيها رأى؟ دى فرصة عمرك يا ابن أختى مش يمكن تاخذنى معاك على فوق.
- فارس أنا صحيح ابن اختك لكن ما كنتش أعرف إنك وسخ للدرجة دى؟
- السعدان إخرس (يرفع يده ليصفعه).
- فارس (يمسك بيد خاله) نزل إيدك ومن النهارده لا إنت خالى ولا أعرفك.
- السعدان فى ستين داهيه. لكن أنا بلغتك وعملت اللى على عشان أمك ماتشيلتيش ذنبك.
- فارس دا تهديد بقى يالازق.
- السعدان أيوه تهديد وإسمع أما أقولك. تتجوز عجائب تبقى ابن أختى وحبيبى ماتتجوزش عجائب يبقى إنت من سكه وأنا من سكه.

يا خسارتك في الهبل ياسعدان يالازق .	فارس
طاوعنى يابن نفيسه - نفذ الأوامر .	السعدان
أوامر مين ياراجل يا معتوه إنت .	فارس
أوامر سيد البلد رئيس المجلس المحلى .	السعدان
(سافرا يغنى) يامحلى ديل العصفوره وعجايب شكل العجوره .	فارس
طاوعنى يافارس .	السعدان
طظ .	فارس
ما تقفش قدام التيار يا فارس .	السعدان
طظين (المخبرين يدخلون من خلف فارس فيراهم السعدان فقط) .	فارس
أنا عملت اللى على وبلغتك أمر الباشا .	السعدان
تلاته طظ واتنين بقشيش بيقوا خمسه .	فارس
(يهجمون على فارس ويحملونه وهو يحاول المقاومة) .	المخبرين
خالى - الحقنى يا خالى .	فارس
خالك سته طظ وأربعه بقشيش بيقوا - عشرة طظ .	السعدان

مكتب رئيس مجلس الكفر

الرئيس

يجلس الى مكتب فاخر فى حجره تتناثر فيها
اللافتات فعلى أحد الجوانب لافته كبيره بخط
واضح تقول - هذا من فضل ربي وعلى الجانب
الآخر لافته عليها بيتين من الشعر هما:

ملك الملوك إذا وهب

لا تسألن عن السبب

الله يعطى من يشاء

فقف على حد الأدب

واللافتة الرئيسية معلقه فوق رأسه مكتوب عليها -

موتوا بغیظكم وعلى المكتب نفسه تظهر بوضوح

أشياء لمنع الحسد مثل حدوة الحصان وخذاء طفل

صغير وخمسه وخميسه وبومه محنطه تمسك

بمنقارها - ياناس ياشر كفايه أر - يدخل الحديدى
ويؤدى التحية العسكرية.

تمام يا باشا البضاعة وصلت وفى إنتظار الأوامر.
دخل الدفشه

الرئيس
الحديدى (يؤدى التحية العسكريه ويخرج ليعود بأم الشحات
مربوطه بالحبال ويؤدى التحية العسكرية)

أم الشحات (باكيه) كده برضه يا حامى الكفر؟ كده يتعمل
فى ونفسك مالى الدنيا؟

الرئيس مين اللى ربطك كده يا أم الشحات.

أم الشحات اسم النبى حارسه الشاويش ده يا باشا

الرئيس فكوها يا حمير.. أنا طالبها أدرده معاها شويه.

الحديدى سعادتك عودتنا يا باشا إن المطلوب يجى حياً
والأفضل ميتاً.

الرئيس أيوه لكن دى بنتنا - مافيش تمييز يا حديدى..
فكوها.

الحديدى أمرك يا باشا (يقوم بفكها بنفسه).

الرئيس سيبنا شويه يا حديدى (الحديدى يؤدى التحية
وينصرف)

أم الشحات دول بهدلونى يا باشا.

الرئيس خلاص بقى. انتى حتعملهم على أنا كمان..

اقعدى (تجلس) هيه؟

يتلغى فى الميغه جامد مش كده؟ ناس هايصه
وناس لايصه.

أم الشحات فضلة خير سيدنا وتاج راسنا - آمال الدنيا دى كلها
عايشه بنفس مين والخلق اللى ماليه الشوارع دى
بتاكل من خير مين؟ ربنا يديم خيرك وعطفك
علينا وعلى أمة المسلمين ويمد يدك ويزهر عهدك
قادر ياكريم.

الرئيس كويس الشغل اللى انت عامله فى السوبر ماركت
ده انتى وولادك الصيع.

أم الشحات رضا الباشا هو مقصودى ومطلوبى من الدنيا.
الرئيس الموضوع اللى فى التقرير الأخرانى اللى هو
موضوع عجائب وفارس انتى متأكده منه.

أم الشحات بتموت فى دباديبه اسم الله على مقام سيدى؟
الرئيس وهو؟

أم الشحات هو مش واخذ باله من أصله.
الرئيس وافرضى انه خد باله.

أم الشحات أوامر سيد الكفر تتنفذ على عينى وراسى.
الرئيس آه يا مرضعة إبليس يا شيطانه - كده أنا ح أرضى
عنك.

أم الشحات (تزغرد).

الرئيس (يضغط الجرس فيدخل الحديدى ويؤدى التحية العسكرية) هاتو الفرפור.

الحديدى (يؤدى التحية العسكريه ويخرج ليعود بفارس مربوط بحبل وآثار التعذيب باديه عليه)

الرئيس اخرج انت يا حديدى (الحديدى يؤدى التحية العسكريه ويخرج) هيه؟ لسه متمسك بطظ.

فارس أنا ما قصدتش الباشا بالكلمه دى.. واللى بلغك كده كذاب.

الرئيس (صارخاً) ولد..

أم الشحات العفريا باشا.. عيل صغير مايدر كهاش - السماح يا أسيادى هدى النفوس ياللى بتهدى.

الرئيس آخر مره ترفع صوتك هنا. ولما أنا أتكلم تقف تسمع بدون تعليق أنا علمتكم الحريه مش قلة الأدب والتجرمه.

أم الشحات أى نعم يا سيادى أى نعم فارس من ولادك يا باشا وست نفيسه مامته بتدعى لك ليل نهار يصلب ضهرك ويطلق زهرك.

فارس أنا يا باشا ما فهمتش حاجه من خالى السعدان.. دا راجل مبرشم على طول وما بيجمعش.

الرئيس اذا كان الأمر كذلك تبقى دى نقطه فى صالحك
قوى فكيه يام الشحات.

أم الشحات (وهى تفك فارس تهمس له) قول نعم حاضر
وسيب الباقي على خالتك أم الشحات - أمك
حبيبتى وانت خساره فى البهدله يا فارس.

الرئيس تعالى يا ولد اقعد هنا (يجلس فارس) فتح ودانك
كويس قوى أنا عارف موضوع الطيران اللى لبس
جتتك اليومين اللى فاتوا دول.

فارس أنا عايز أسافر أمريكا يا باشا أنا عايز أطيرو يا عالم
الرئيس ماتقاطعنيش يا ولد.

فارس أنا يا باشا ح أرفع راس بلدى وأطول رقبة سعادتك
واكتب اسم كفر سين ورئيسها على خد القمر.

الرئيس دا كلام أغانى ده - وانتى يا وليه يام الشحات.
أم الشحات خدامتك يا تاج راس الكفر.

الرئيس انتى اللى حنطبخى الطبخه وتغرفيها وتأكليها
للمعازيم.. الولد فارس يتجوز عجائب المقابله
انتهت.

فارس بس يا باشا.

الرئيس (صارخاً) ولد.

فارس ماباحباش يا باشا.

الرئيس

(صارخاً) وأنا قلت تحبها يعنى تحبها.

(أم الشحات تخطف فارس وتخرج به قبل تأزم

الموقف ويخرجان)

فارس

ياناس.. يا ناس يا خلق هو

ويغنى يا ناس يا خلق هو

يا ناس يا خلق هو

الحب وصنعوه

والقلب من البلاستيك

دلوقتي بيعملوه

يتنهـد نـفـط بمبى

لوشاف غزاله جنبى

ويروح يسكر فى ويمبى

وهناك ح يولعوه

ياناس.....

الله يرحم زمانك

يا روميو

يا رومانسى

ويا عنتر يا عاشق

مهجور سنين ومنسى

كان الغرام زمانكو

فؤاد بالأنس عامر
واحنا فى زمن فيشينكو
والحب بالأوامر.

بقت محبه كيميا
عيانه بالأنيميا
برشام حسب الروشته
والناس بيبلبعوه
يا ناس يا خلق هوه

(المحب)

(شجرة تتدلى منها خية حبل المشنقه يقف تحتها

فارس وأم الشحات)

فارس إنتى متأكده انها جايه؟

أم الشحات أنا اللى عاطياها المعاد (يسمع وقع أقدام) إسمع

كده أهه وصلت.

كمونه (يدخل فيفاجأرن) ما جمع إلا أما وفق.

فارس إيه العنكبوت اللى معشش على وشك دا يعطار.

أم الشحات بسلامته لسه خارج م التحفظى بشوكه.

كمونه أه يا لمامه يا حوش يا متأمرين يا كلاب.

فارس مقبوله منك بالنسبه لسنك بس ياريتك بقى تدينا

عرض قفاك وتسمعنا سلامو عليكو.

كمونه عملت لكرايه عجايب عشان تعملوا فيها كده!؟
أم الشحات عمك اسود ومثيل - وانت ايش أخشك فى اللى ما
لكش فيه.

كمونه وشرفى ما حتوصلوا لعجايب إلا على جتتى.
فارس بس أنا سمعت انك سبت شرفك فى التحفظى
يا أخ كمونه.

كمونه يا انتهازى يا حقير.
أم الشحات باقولك ايه ياكمونه وشرف الباشا إن ما اتلميت
لابعتك ع المعتقل الكبير بالبريد المستعجل.

فارس يا للاشاطر عايزين نشوف شغلنا .. اتمشى افرنجى
كمونه أنا ح اتمشى يافارس يا بن أخت اللازق يا أصيل ..
ح اتمشى يام الشحات . أنا رايح لعجايب فوراً
عشان أكشف ملعوبكو القذر وبعدين حيبقى لى
حساب معاكو.

أم الشحات طب ياخويا هم شوية آمال وماتنساش تبعتها
بسرعة - قبل الحبيب ما يزهق ويمشى وترجع هى
تسقف على بطاطها.

كمونه طيب ياعقربة يامرضة قلاوون .. خليتك بعافية
ياكايتن .. ولازم حنتقابل (يخرج) .
فارس وبعدين .. أنا خايف ليقابلها ونتكشف .

- أم الشحات ياخويا اسم الله عليك.. يقابلها ازاي وهو مترقب.
 فارس مترقب؟ ودا حيراقبوه ليه التافه ده؟
- أم الشحات اسم الله على مقامك هو مش خارج م التحفظى
 يبقى لازم يتراقب سنه.
- فارس أعوذ بالله دانتي مرجع فى القانون.
 أم الشحات مش بيقولك إسأل مجرب.
- فارس انتى جربتى كل السجون والمعتقلات.
 أم الشحات أمال حيشغلونى معاهم من منازلهم.
- فارس الله يخرب بيتك.. كل اللى جوالى ده من تحت
 راسك يا مرضعة إبليس.
- أم الشحات هنيين وفرحين.. بس إياك تبقى تفكرنى لما
 البليه تلعب معاك.
- فارس بليه؟ طيب ياختى ياروش المصايب.
 أم الشحات بكره تقول نينتى ام الشحات هى سبب هنايا
 وفرحى.
- فارس بقى انا الكابتن فارس الطيار ينتهى بى الأمر
 وأمثل دور العاشق الولهان على غزیه كفر سين
 اللى مقطعه السمكه وديها!
- أم الشحات وصلت ياسى فارس وصلت (تنسحب).
 فارس (يضع الخيه فى عنقه ويقول بصوت مسموع)

عجایب (تدخل باحثه فی المكان) هی الولیه دی ماجتیش
لیه.

فارس الوداع یابو الفوارس.. إنا لله وإنا لله راجعون.

عجایب (تندفع نحوه صارخه) استنی یاجدع.. یالیهوتینی
الحقونی یاناس الحقونی یاخلق هوه.

فارس (وكانه فوجیء بها) الله یخرب بیتك.. أنتی
طلعتی لی منین؟

عجایب عایز تعمل ایه فی روحك؟

فارس وانتی مال أهلك؟

عجایب وأنا مال أهلی ازای یابن المجنونه! أسیبك تضيع
شبابك هدر.

فارس یاستی میت نیله علیکی وعلی شبابی.. هو فین
شبابی ده؟

عجایب لیه؟ هو انتو ماعندكوش مرایه فی البیت؟

فارس طب اتكلی علی الله شوقی كنتی رایحه فین؟

عجایب وانت؟

فارس أنا برضه ح أتكل علی الله.. بس م الطريق
السریع.

عجایب اوعی تكون لسه ناوی.

فارس أنتی تعرفینی؟

- عجائب وهو فيه حد فيكى ياكفر سين مايعرفش الكابتن
 فارس اللى حيطير برابة بلدنا على فوق؟ ومين
 عارف مش يمكن ياخذنا معاه فى العلالى .
 وانتو بقى حتعملوا ايه فى العلالى؟
 فارس نخدم بعيننا ونقدم اللقمة الهنيه والعيشه المرية .
 عجائب وانتى بقى تطلعى مين سيادتك؟
 فارس أنا أطلع خدامتك عجائب .
 عجائب عجائب؟ بيتهيالى سمعت الاسم دا قبل كده .
 فارس ما هو أنا
 عجائب ما هو انتى ايه؟ آه .. انتى عجائب الغزيه بتاعة هز
 فارس ياوز .
 عجائب لا ياخويا دا كان زمان وجبر- أنا دلوقتى الحمد لله
 استقمت وبقيت صاحبة عتب . ما هو أنا بتاعة اللى
 ما يشتري يتفرج .
 فارس يعنى انتى عايزه تفهمينى إنك خلاص بطلتى ال .
 عجائب يوه من زمان ياسى فارس .
 فارس أمال أنا مادريتش ليه؟
 عجائب هو انت دارى بحد ياسى فارس .. يوه .. قصدى
 يعنى انك فى نفسيتك كده ولا سائل عن حد .. إنما
 احنا بقى سائلين عنك كل دقيقة وكل ثانية .

- فارس إنتو؟ إنتو مين؟
- عجائب يوه بقى ياسى فارس.. احنا كلنا يعنى.
- فارس أيوه.. كلكو يعنى مين؟
- عجائب ماتبقاش واد غلس بقى.
- فارس أيوه أيوه أيوه.. طب ماتقولى كده من الأول..
- عجائب دانتي أتاريكى بترسمى على تقيل قوى.. بس ياخساره نعبك طلع على شونه ياشابه.
- عجائب لا دانت غبى قوى.. خليتك بعافيه اشق روحك ولا حتى ولع بجاز (تنصرف).
- فارس إستنى بس ياسمك إيه انتى.. إنتى يا..
- عجائب (تعرد) ماقلت لك زفته عجائب.. إنت أطرش.
- فارس مش قوى كده.. كنت عايز أرغى معاكى حبتين.. لكن يظهر ان عندك وردية ليل.
- عجائب تانى.. يخرب بيتك ويكب زيتك قادر ياكريم.. هو انت ياواد مبرشم باقولك انتيلت تبت تبت.
- فارس أيوه يا عجائب ياختى تبتى عن إيه ولا إيه ولا إيه
- عجائب دانت واد لسانك عايز قطعه.
- فارس طب إيه رأيك فى الحب؟
- عجائب الكذب خيبه ماجريتوش.
- فارس ليه بقى! انتى من النوع اللى مايبحبش؟

- عجائب
فارس
عجائب
فارس
عجائب
فارس
عجائب
فارس
عجائب
فارس
عجائب
فارس
عجائب
فارس
عجائب
فارس
عجائب
فارس
- لا وانت الصادق أنا م النوع اللي ما بينحبش .
يا خساره .. آه لو ما كنتش ح أموت دلوقتي .
يا خويا تفها من بقك .. الشر بره ويعيد .
مش أحسن ما أعيش فاشل وابقى معيره لكل من
هب ودب .
امش قطع لسان اللي يقول عليك حرف .. دا انت
الكابتن فارس الطيار على سن ورمح .
الاسم ده ثمنه غالى قوى يا عجائب .. والعين
بصيره والايد قصيره .
الكتف دا زاد والكتف دا ميه يا أغلى الناس وعلى
رأى المرحومه أمى اللي فى الدست بتطلعها
المغرفه .
يابنت الناس روحى لحالك .. أنا مشاكرى كتيره .
ما يكثرع الحب شىء .
وانتى ذنبك إيه معايا .
القفه أم ودنين بيدلونها اتنين ياسى فارس والدنيا
لسه بخير يا خويا والكلبه لسه ماكلتش ولادها .
عجائب ..
عيون عجائب .
نفسى أقولك كلمه .. بس خايف ماتصدقنيش .

عجائب مصداقك من قبل ما تتكلم .

فارس واشمعنى مصداقانى أنا .

عجائب القلب وما يريد .

فارس واشمعنى قلبك رادنى أنا .

عجائب خد عنيه شوف بيها .

فارس يا حبيبتى .

عجائب يا حبيب قلبى وروحى وعينى وعقلى .

فارس أقول يا عجائب .

عجائب قول ياسى فارس .. قول .. مش عايزه اسمع الا

صورتك ولا أفهم الا كلامك ولا اشوف الا

صورتك .. قول قول ياسى فارس .. قول .

م البر التانى من وادى الموت

جيتك يا غزالى على نده الصوت

م البر التانى من ليل الخوف

جيتك يا غزالى على ضى الشوف

حبيبى بيندهلك شببك لبك

وان مارضوش أهلك أنا ملك اديك

ياسلام على قلبك وجنونه

ياسلام على حبك وفنونه

أنا قلبى ضعيف وأنا عقلى خفيف



بالطيف الحب عسل في رغيـف
 وحكايه ف نظره وحلم رهيـف
 بنجوم وهلال وهدم أطفـال
 وغناوى حلال على لحن ظريـف
 يا لطيف يا لطيف
 يا لطيف الحب مدينه وريـف
 فى سرايا ف حاره ف بيت و رصيـف
 يبدر أشواق تطرح عشاق
 على كل مرابه وليف ووليـف
 يا لطيف يا لطيف

كمونه

(يدخل مسرعاً) آه ياقلبي عليكى يا عجايب - نغد
 السهم - وبلعتى الطعم و شربتى السم فى العسل
 وكبش وطواط الحب فى حشاشه قلبك ولبد وعمره
 بقى ماهو طالع ولا بالطبل البلدى.

شباكى يا شباكى يامه

يا عيون السهر

شفت الحليوه تاكى يامه

فوق خد القمر

أرعى رعى قلبى يامه

من خوف الفرح
والأعمال بعقلي يامه
وأطلع له القمر

فہی السوبر مارکت

مسعدہ	یاراد نشفت ریقی .. ماتنطق بقى .
الشحات	أنا خايف يامسعدہ .
مسعدہ	خايف من إيه يا شحات .
الشحات	خايف أتکلم .
مسعدہ	خلاص اسکت .
الشحات	وخايف أسکت .
مسعدہ	هو إيه أصله ده ! منين خايف تتکلم ومنين خايف تسکت .
الشحات	أصل أنا مثقف يامسعدہ وشخصيتى ترددیه .
مسعدہ	يعنى إيه بقى ؟
الشحات	يعنى أنا هاملت .
مسعدہ	حتمط هدرومك فى الشارع ؟ انت اتجننت ياراد

ياشحات .

الشحات هاملت هاملت يا جاهله .

مسعده والنبي ما أنا فاهمه حرف م اللي بتقوله .

الشحات مش انتى بتحبى عجائب؟

مسعده عجائب دى روحى .. فيه حد ما يحبش روحه؟

الشحات يبقى لازم تقولى أقول ولا ما أقولش .

مسعده تقول إيه؟

الشحات خايف أقول .

مسعده طب ماتقولش إيه؟

الشحات برضه خايف ما أقولش .

مسعده والنبي انت مبرشم يابن ام كيداهم (تتركه وتتجه

لداخل السورماركت)

أم الشحات ياختى البت عجائب اتأخرت كده ليه؟

مسعده ربنا يجيب العواقب سليمه .

أم الشحات يمكن تلاقيها رجعت تانى لعنبد ديبه . أدى رابع

ليه تخرج العصر ماتجيش إلا آخر الليل .

الشحات يامه بطلى نميمه بقى .. إنتى إيه؟ مابتياشيش .

أم الشحات إخرس ياواد .. إيش فهمك انت فى شغل النسوان ..

كان المدهول أبوك فهم قبلك .

عجائب (تدخل ساهمه وكأنها تطير)

- مسعدہ عجایب .. کنتی فین یاللی تنشکی؟ سیبتی رکبی۔
 عجایب ایہ؟ لآ۔ لا لا مافیش۔
- مسعدہ انہو مافیش فیہم (تتظر لآم الشحات) دا فیہ ناس
 کتیر مافیش فی کفر سین۔
- عجایب ہو یا مسعدہ۔ ہو.. اللہ علی جماله اللہ اللہ اللہ۔
 مسعدہ یالہوی جمال مین یابنت المعتوہہ۔
- عجایب الفجر یا مسعدہ الفجر یا شحات.. الفجر یا خالتي
 أم الشحات.. أجمل طفل فی العالم بیتولد کل لیلہ۔
- أم الشحات یالہوی.. هو الفجر بقی بنی آدم زینا ویتولد۔
 الشحات إستنی یامہ.. آیوہ یاعجایب۔
- عجایب الفجر یا شحات.. فاکرہ الفجر یا مسعدہ؟
 مسعدہ قطع المذكور.. هو احنا کنا بنخاف إلا منه ومن
 فضایحہ۔
- عجایب اللیلا دی وکل لیلہ باقابله یا شحات حاجہ تانیہ
 خالص۔
- الشحات إوصفیہ یا عجایب۔
 عجایب رقیق وجمیل.. زی طفل علی وش ابتسامہ۔
- الشحات اللہ اللہ اللہ۔
 عجایب زی التوب البمبی بتاع لیلة الحنہ.. أوزی فرحة
 یوم الوقفہ بشیر العید (تترنم بلا موسیقی)۔

يا برتقان أحمر وجميل
بكره الوقفه وقلبي يميل
يا برتقان احمر و جديد
بعد الوقفه يجينا العيد
يا برتقان احمر وصغير
بكره الوقفه وبعده نغير
يا برتقان احمر وكبير
توب الوقفه حرير في حرير

هوذا الفجر اللي ماشفنا هوش يا مسعده .. مرسال
النور اللي جايب البشاره للخايقين والحيارى ..
إصحى يانايم وحد الدايم .. الضى شعشع ويان
والليل هرب زى الجبان ولى الظلام من سكتك ..
فتح وقدم خطوتك .. إعشق يابن آدم وميل لسه
الطريق طويل طويل خد الصديق قبل الطريق
والخطوه من حظ الجرىء .

الخطوه من حظ الجرىء .. آه يا عجايب يا بحر
الحب يا بستان الفرحة .. كل يوم يتزيدى ف قلبي
وتكبرى .. ما خلتيش فى قلبي مكان لحب تانى ..
يا بختك انتى بقلبك اللي سايع الكون .. اللهم لا
حسد .

الشحات

يا عيني يا عيني.. على الطلاق انتولتئين اتجننتوا	مسعده
شوفوا بنت الكلب اليومه.. حتكتب لى ع الجنان	عجايب
عشان فرحت مره ف عمرى.	
(يحدث هرج خارج السوبرماركت)	
كده برضه يا عجايب تبهدلى ناسك.	صوت
احنا اللي نستاهل عشان بنيجى هنا.	صوت
حقه السوبرماركت فاضى واحنا برضه بنيجى.	صوت
يا عم دى وصلت خلاص - هى مالها بقى ومال الغلابه.	صوت
أنا رأيى إن الحدوته من أساسها كذب فى كذب.	صوت
(تخرج فترى أولاد أم خيشه ينهالون على الناس بالخرزان) ايه ده اللي بيحصل هنا ده؟ إنت يا واد يا خيشه بتضرب الناس.	عجايب
مش عايزين يقفوا فى الطابور يا أبلتى.	خيشه
وانت مين قال لك توقفهم طابور؟	الشحات
أمك اللي قالت لى	خيشه
ليه كده يام الشحات.	عجايب
أم الشحات اسكتى إنتى بس أنا واخده على شغل الجمعيات وعارفه الأصناف دى كويس.. دول مايجوش إلا بالسك.	أم الشحات

عجائب كده يأم الشحات.. تضرى ناسى عشان تطفشيم
منى وتضيعى عهدى وتخرى بيتى.. كده يام
الشحات.. دى آخرتها.

مسعده مانتى ياختى اللى سايبه السايب فى السايب
وهيمانه فى حب الله.

عجائب إستنى يامسعده أما نشوف الناس دول بينضربوا
ليه؟ أنا عايذة أعرف.

الشحات هو انتى لسه ماعرفتيش يا عجائب؟

عجائب ما فيش سبب يبرر ضرب الناس بالخرزان.

الشحات فيه سبب واحد يبرر أى شىء يحصل فى الناس.

عجائب قولهلولى يا شحات.

الشحات انتى عارفاه يا عجائب

مسعده دى فزوره بقى؟

الشحات أبدأ؟ الفقر يا عجائب.

عجائب الفقر يا شحات.

الفقر بالفصحى ألف همزه

والمعنى يا تلامـذـه

حيوان حرامى بيسرق المأكول

ويقرض الملبوس

لحظة ظهوره بندقن الهمسه

فى الغمزه واللمزه
إذ ربما يمكن يقع مشلول
فنعلقه بلبوص
ويرغم إنه كـده
محطوف ككشف العدا
فنهايته فى مصيده
أوشكه من دبوس
والفقر فى العامية بالهمزه
الحقنى يا حمزه
حاكم ضلالى يحاكم المقتول
ويحطع المتعوس
أسباب وجوده
دوله غـداره
ورعيه صباره
لا محكمه ف شرعه ولا دستور
والضلمه زى النور
والظلم فوق العدل
والحر تحت النذل
لا الصبر بي هونه
ولا الدرا ملموس

(كمونه يدخل فجأة طويل الذقن معفر الوجه)

مصطفى على مصطفى

قلب الجميل يصفى

وأنا عندي كلم وصفه

للفقريا تعبان

لو كان على باله

ما كانشى ده حاله

ولا باعشى خلخاله

الخابب الصدمان

نفظان ياشيخ الجان

يا عاببر الخلجان

لف الرحاية دورين

واطحن دوا العيان

عيان هواه علتاه

وجرعه من غلته

وعطشه من قلتاه

وايش يعمل الغلبان

حط الملك بقشيش

فوق الأمير يغليش

واخلط عليهم دول

حنه وقرض وياميش

عجائب

كمونه

عجائب

كمونه

عجائب	رياميش حلاوه عليك
	لو شلتهم بإديك
	ودهننت من رجلك
	لدماعك الخريان
الاثنين	دهن الملوك موصوف
	زى العرق ع الصوف
	بيطمن الملهوف
	ويحزر البردان
عجائب	تعالى ياكمنه.. أنا عايزاك
كمنه	وأنا عايزك
عجائب	إنت كنت فين بقى لك جمعه
كمنه	ياه! للدرجه دى ماكنتيش شايفانى يا عجائب
عجائب	كمنه كنت فين صحيح
كمنه	كنت فى ضيافة الحديدى أربع تيام
عجائب	ليه؟
كمنه	مش مهم ليه المهم انى خرجت أدور عليكى لقيتك رحتى هناك.
عجائب	رحت هناك؟ هناك فين ياواديكمنه؟
كمنه	هناك.. فى سكة اللى يروح مايرجعشى.
عجائب	والنبي انت فايق ورايق.

فضلت أشاورك أشاورك وانتى عنىكى عليه هو	كمونه
هو مين ياكمونه.	عجايب
اللى ببيان ومايطلعش.. خوفتىنى علىكى يا عجايب	كمونه
ياخويا ماتخافش على غالى.. المهم حمدالله على سلامتك.	عجايب
حمد لله على سلامتك انتى ياأغلى الناس وأعز الناس.	كمونه
أنا باحب ياكمونه.	عجايب
ودا مين سعيد الحظ.	كمونه
حزر فزر.	عجايب
غلب حمارى.	كمونه
فارس ياكمونه.. باحب فارس.	عجايب
(صامت)	كمونه
فين حكلك يادكتور مالك اتبرشمت كده زى القفل الصينى.	عجايب
وأخرة الحب دا يا عجايب.	كمونه
حنتجوز ياكمونه.	عجايب
(صارخاً) فارس دا جاسوس يا عجايب.	كمونه
إخرس قطع لسانك	عجايب
أنا يا عجايب	كمونه

- عجائب إنت وعشره زيك
 كمونه إنتى مش فاهمه حاجه يا حماره .. أنا عايز أتكلم
 معاكى على انفراد
- عجائب (بخلاعه جارحه) هىء هىء .. كان زمان وجبر
 كمونه يا عجائب انتى فى خطر وأنا خايف عليكى
 عجائب كل واحد يخاف عى نفسه .. أنا مش قاصر
- أم الشحات (كانت تتلصص عليهما) أما أمرك غريب يادى
 الجدع .. بتقول لك حل عنى .. هو الحب بالعافيه .
 كمونه انتى تسكتى خالص يا جاسوسه وحسابك معايا
 بعدين .
- عجائب حسك عينك ترمش لها ولا تهوب ناحيتها (تتركه
 وتخرج)
 كمونه (يصرخ) عجائب اتجننت يا كفرسين - عجائب فى
 خطر يا مجاريح كفرسين
 (يعنى موالا)
- كمونه قلبى الحنين رفرف على طيرى انظر
 وقلبه هو عليه أجمد من الحجر
 يارب يا معلم الطير يعشش ع الشجر
 تهدى حبيبى .. وتحرسه وتعلمه
 يمشى فى طريق النور .. ونجيه م الخطر

الفضيحة

(فى السوير ماركت شبه الخالى من البضائع أم
الشحات وفارس وحدهما)

فارس كده نبقى أنجزنا المهمه بدون خسائر فى
الأرواح.. بسم الله ما شاء الله السوير ماركت بقى
ع الحيطان ويكره حنبيع الحيطان وأنا بقى على
فوق.

أم الشحات على فوق فين إسم الله عليك (تدخل عجائب دون
أن يحسوا بها فتختبىء لتسمع)

فارس ع السماع الطيران

أم الشحات والجواز

فارس جواز مين يا وليه ياقرشانه

أم الشحات جوازك من عجائب انت مش.....

فارس ماتكمليش.. مش عايز أسمع السيرة دي تانى..
فاهمه؟

أم الشحات والباشا ياسى فارس...
فارس يا حمارة وقوليلى نعم الباشا ما كانش قاصد الجواز
لمجرد الجواز... الهدف كله كان تدمير السوبر
ماركت والسوبر ماركت أهو اتدمر بفضل باعك
الطويل وذمتك الواسعه وإنشغال عجائب بحبى
يبقى إيه لزوم الجواز... فهمتى؟

أم الشحات أنا پابنى فهمت حاجه واحدة بس إن الباشا طلب
منك تحب عجائب...

فارس حبك برص إنتى وهى أنا أحب دى.. أنا الكابتن
فارس الطيار أحب واحده مستهلكه زى عجائب أنا
عايز أطير يا وليه وأتجوز من بنات الحور.

أم الشحات وماقلتش الكلام ده للباشا ليه؟

فارس وإننت مال أهلك

أم الشحات مال أهلى إزاي مش الباشا قايل إن أنا اللى ح أطبخ
الطبخه وأكلها للمعازيم.

فارس الطبخة حمضت يام الشحات وأنا عملت المطلوب
منى والسوبر ماركت فلس والموضوع كله خلص..
يبقى كده أنا أتلايم ع الفكه وأسافر على أمريكا

أطير من هناك واللى يحصلنى يبقى يمسكنى .

أم الشحات أنا يابنى ماليش فى الكلام ده .

فارس طبعاً مش إتملتى م السرقة وخذتى حقك ناشف ..

لكن وشرفى إن ما خدت مقاولتى لآكون عامل

لكم فضيحة بجلاجل... شاو (ويخرج)

عجائب (تكون قد وصلت الى درجه لم تعد تتحكم فى

أعصابها تدور حول نفسها مهمة لا.. لا.. لا

(صارخة) ل آآآ .

تغنى

مش نافع فىكوا الحب

طيب يا اولاد الكلب

أنا كنت زمان

إحساس وحنان

دلوقتى خلاص

بقى كان ياما كان

والله لأخلى التاجر فىكوا يبيع أوهام

يشترى أوهام

ويقوم وينام

على فاضل كام

ع العتبه الخضرا ومستشفى المجاذيب يا ديايه

يا أمييا الأنايبب مش نافع فيكو الحب

طيب ياولاد الكلب

كمونه أخيراً عرفتى يا عجايب

عجايب شمتان فى ياكمونه؟

كمونه إخص عليكى يا عجايب.. أنا أشمت فىكى فيه حد

يشمت فى جرحه؟

عجايب والنبي ياكمونه تسيبنى باللى أنا فيه

كمونه ياما قلتك يا عجايب وياما شاورت لك.. لا سمعتى

ولا شفتى

عجايب طيب ياسيدى كتر خيرك ممكن تسيبنى بقى

كمونه مقدرش أسيبك يا عجايب.. أنا با..

عجايب قطمت ليه ماتكمل إنت كمان

كمونه أنا باحافظ ع العهد وباحميكى من نفسك.. اوعى

تبيعى الناس يا عجايب

عجايب إنت لسه حتقوللى الناس

كمونه أيوه يا عجايب وح أفضل أقولك ولازم تسمعنى أنا

عارف إنك مجروحة وموجوعه وباريت الجرح دا

كان فى نن عينى وإننت الف سلامه عليكى

عجايب ومين اللى جرحنى ووجعنى مش الناس بتوعك؟

كمونه لا يا عجايب أم الشحات وفارس دول مش ناس..

دول أدوات فى ايدين الظالم عشان يضرب بيهم
الناس.

عجائب (صارخة) كفايه.. إعمل معروف يا كمونه اذا
كنت بتعزنى صحيح سيبنى وكل واحد يروح لحال
سبيله

كمونه (شبه باكى) ما قدرش يا عجائب

عجائب تبقى مابتعزنيش

كمونه أنا؟ الله يسامحك يا عجائب

ياميت خسارة يا عجائب.. يا عينى عليك

يا كفرسين انصف واجمل مافيك خلاص.. لا

زهرة حب فتحت فيك الا ودبلها الخريف ولا

شمعة أمل نورت إلا وطفاهما الريح المجنون..

خراب وظلام يا كفرسين مدد يا أبو الوفا يا حلوانى

مدد مدد!!!!!!

عجائب خليتك بعافيه

كمونه (بلهفة) على فين يا عجائب

عجائب أرض الله واسعه

كمونه حتعملى إيه فى روحك يا بنت الناس

عجائب اللى يعمله ربحا ح يكون بكره تسمع وتشوف

(تخرج)

«الجزء الثانى» فى السوق

كمونه (يدخل ومعه الشحات الذى يردد خلفه
نهاية كل جملة فى المنولوج)
يغنى أغنية بلدى وحوله مجموعه من الأطفال
يرددون خلفه كوسيله لجمع الناس ولكن الحزن
يبدو واضحاً فى نبرات صوته

بلدى بلدى

وأنا أحب النسخه البلدى

فيتامين بالمزه

بلدى

إشرب واتغذى

بالادى

لف المغزل تانى تانى

ربط الكلمه ف طرف لسانى

مهما رأيت ع البر التانى

ما أنسى طعامه بلدى

بالادى

بالادى وأنا أحب النسخه البلدى

رحت جناينى ورا النسوان

م البياره للبستان

شفت عشقت

شربت كمان

بس مافيش الورد البلدى

بالادى بالادى

وأنأ أحب النسخه البلدى

فيتامين بالمزه

بالادى

إشرب وإتغذى

بالادى

يا ليلة الجمعه يا أغلا الليالى ياعود رخام فى الجنه

يلالى غاب القمر سقط القمر فى النهر والليل هجم

ويقينا آخر شهر آه يا مخزن القهر يا ساكت يا قلب

الواد كمونه ياكتاكت طبيب تداوى كل البلاوى

كمونه

عطار تفوح المسك والجاوى وحاس حاس أسقى
الحبايب دمعتى وأنا خالى الوفاض والكاس وآه
يابلد فيها وما فيهاش - قال ياما قال يا سعد
يابقال... قال ابن عروس ما حد خالى من الهم
حتى قلع المراكب... ولا جته خالية المرض ولا
دابه غير ليها راكب... قال لك يا راكب الوهم قلة
فهم بزياده... الوهم عادة تصيب العاشى
والراكب... وحدوه... قالك شرية الدود تورد
الخدود؟ قالك لأ.. قالك حزمة الجرجير تصحى
القتيل؟ قالك لأ.. قالك شوربة الكوارع تغرق
الشوارع؟ قالك لأ.. قالك الجمبرى يقدرع
المفتري؟ قالك لأ.. قالك بلبوعة كموه العطار
بالصلاح النبى المختار تشد مرخى العصب
وتوصل التيار... البلبوعه دى يا مواطن سهلة
التركيب... سريعة التدويب ولا حوجتك يا بن آدم
لعدم المؤاخذه المزين والطبيب... تجيب لبان على
غصن بان على قعر جردل فى كستبان على رجل
تعبان لثيم على قلب هدهد يتيم على رمش نملة
متزوقه على كبد معزه متطلقه على ودين ضوفر
من قرد صايم على بق صابح من بحر نايم على

ربع ورقة «الخشخشان» على لتر حامض البرنجان
واحد يقول والحق معاه .. لا إله إلا الله رزق
عيالك فى البلابيع تكشف سر الصنعه تضيع ..
قال لك خلى الضجر لناس غجر وارمى حمولك ع
اللى رازق الدوده فى الحجر وإعمل الخير وارميه
البحر واقولك يامواطن بأن قرشك مش حيروح
هدر البلبوعه دى وهبتها حق مسح جزمه وقرش
على قرش يبقوا إثنين وإثنين وإثنين يبقوا أربعة
تلوشك حيه مريعه ياللى تستندل وتدينى قفاك ..
معاك حتاخذ مامعكش ح تاخذ مد إيدك لبتت
بلدك عجائب فى زنقتها أولى من الهم يركبها
والذل يمقتها عجائب اللى إشرتت ناسها وباعت
المال والجاه وعادت فى حينا أحط خلق الله وأولهم
كلب الكلاب سعدان اللازق الكداب .

سعدان (يدخل الحلقة) بتقول إيه يا ولدا؟ بتتهجم على

أسيادك يا كلب يازعلوك

كمونه (يضحك) دا بيقول يازعلوك - أول مره أشوف

واحد ألدغ فى الصاد.

سعدان بتتمألت على يا عطار الزباله؟ لكن الحق مش

عليك الحق ع الكفر اللى مابقاش فيه كبير وصغير

الشحات	ياعم الكبير فوق والقوى فوق والمنتقم الجبار فوق
السعدان	بتستعدى على ربنا يا بن الدلالة؟
كمونه	كلمنى أنا مالکش دعوه بيه
السعدان	هو أنا ح الأحق ع الكلبه ولا على ولادها
الشحات	الكلبه بتحرس مطرحها يالازق إنما الخنزير
	بينجس مطرحه
السعدان	إنت مش مكسوف على أمك واختك يابن أم .
	الشحات
كمونه	خليكو شاهدين يا عالم - الراجل دا جاى يقول شكل
	للبيع
السعدان	إنت واقف كده ليه يا شاويش
الشاويش	إمسك أعصابك بس يا لازق بيه
السعدان	سيب أعصابى وامسك انت الاثنين دول باقولك
الشحات	يمسكنا بمناسبة إيه إن شاء الله سارقين ولا ناهبين
السعدان	معاكر تصریح جمع تبرعات؟
كمونه	إحنا ما بنلمش تبرعات إحنا بنبيع بضاعه
السعدان	يعنى بتمارسوا الغش التجارى عينى عينك
الشحات	وايه كمان يا لازق
السعدان	وواقفين فى الممنوع يا روح أمك
كمونه	ممنوع إيه وغش إيه ياعم صلى ع اللى مش

حتشوفه .. دى بلبوعة كمونة الموصوفة .. وروح

إسأل أسياذك وانت تعرف

السعدان أنا أسأل روحى .. جرهم يا شاريش ع القسم .. ولا

بلاش الواد ده عشان خاطر أمه وأخته.

العسكرى أمرك يا سعدان بيه

الشحات (للعسكرى) أمر مين ونهى مين إنت كمان - هى

البلد سايبه

كمونه وإسمع بقى يا سعدان يا لازق .. إذا كان بيتهيألك

إن عجايب حتقع فريسه فى إيدكو تبقى بتحلم.

السعدان عجايب دى مين! حد فيكو سمع بالاسم ده قبل

كده؟ عموماً ح أبقى أسأل لك عنها الكابتن فارس

ابن اختى

الشحات فارس ده عيل لسه بيمص ف صوابه

السعدان إخرس ياكلب إوعى تعيب ف أسياذك أحسن قسماً

عظماً أقطع لك لسانك

كمونه خلاص يا شحات ... حقك على أنا ياعم سعدان -

ممكن بقى تهوينا عشان نشوف أكل عيشنا.

السعدان (يمسك بخناق كمونة) أنا قلت ما تقفوش هنا

كمونه (يتخلص من السعدان بعنف) إوعى تمد إيدك -

ولو مديت إيدك تانى ح أقطعها لك .. فاهم؟

السعدان بقولك إمشى من هنا وطاوعنى
 كمونه مش ح امشى يالازق وأعلى ما ف خيلك إركبه
 السعدان كده (يضع أصابعه فى فمه ويطلق صفاره)
 كمونه إخلع إنت يا شحات
 الشحات (ينطلق بمنديل التبرعات ويختفى)
 (تفتح الحلقة مجموعة من حملة النبائيت
 وينهالون ضرباً على الناس الذين يفرون ويتركون
 كمونه وحده يتلقى ضرب النبائيت وهو يصرح
 بغیظ

اضرب كمان وارجع
 كلام الناس ما خيبشى
 إظلم وجور وإجشع
 حرام الندل ما يعيبشى
 لكن مسيرك يوم
 تسمعها من مظلوم
 كل الجروح تهجع
 وجرح الظلم ما يطبشى
 (يحملون كمونه مغمى عليه ويخرجون به والناس
 صامتين يدخل الشحات وخلفه عجائب)
 فین كمونه؟
 (صمت)

عجائب

عجائب	مالكم ساكتين ليه؟
الشحات	ما تتكلموا
طفل	دول رجاله اللازق يا أبله
عجائب	(تلحنى على الطفل بحنان) مالهم يا حبيبي رجالة اللازق؟
الطفل	نزلوا على عم كموه العطار بالنباييت وبعدين خطفوه وجربوا
عجائب	(بانزعاج) وانتوا عملتوا إيه؟ (صمت)
طفل	هما ضربوه ليه يا أبله دا كان بيضحكنا ويدينا الشكولاته
الطفلة	آه والنبى يا أبله تقولى لنا هما ضربوه ليه؟
عجائب	(للناس) ماحدث فيكوا عنده ردع السؤال دا يا رجاله؟ (صمت)
عجائب	ماحدث فيكوا شاف اللى حصل يا ناس؟
الطفلة	كلنا شفنا يا أبله
عجائب	(تحمل الطفلة وتحتضنها) يا حبيبتى يا قلب الورد أنا بأسأل الناس الكبار
الشحات	يا ناس ماحدث سمع سؤال عجائب؟

(صمت)

الناس جرى لها إيه يا عجائب

تغنى الناس مبلطين

الشحات

عجائب

«الناس»

الناس مبلطين

زادوا المبله طين

وح يحصل مهما يحصل

والناس تقول آمين

جارك وعمره جارك ونسك ليك نهارك

مكشوف على عوارك صاين سرك سنين

جم ليله جرجروه وبابه شمعه

وقال يا خلق هوه مظلوم يا مسلمين

زنيت زى الهاموش علشان ما تسمعوش

وقلت ما اعرفوش وحلفت ميت يامين

شالوكوا وجمعوكوا على بعض وكوموكوا

وتهتوا والتقوكوا أشتات متبعزقين

رشى لله يا عدوى ويا سيد يا بدوى

خدوكوا شغل يدوى وهزأوا التـخين

الغريبة يابلدنا حـتطول ولاد ولادنا

مدد يا أعلى مادنه وازعق ف الميـتين

طول ما احنا زى ما احنا حيسير بالعكس ريحنا
ومحنه تجر محنه واحنا اللي الى محونين
بالذمه والأمانة إحنا مش مكسوفين

الرئيس وفارس

(الرئيس يجلس بعظمة والحديدي يقف أمامه

كالمذنب)

الرئيس الشيء اللي مش قادر أفهمه لغاية

دلوقتي.. أنا إزاي عينتك مدير أمن

أنا يا باشا لحم كتافى من خيرك

ولحم مخك التخين من خير مين؟

فطمنى يا باشا وقوللى غلطى

إنت لسه مافهمتش يا حديدي

بخصوص إيه يا باشا؟

الله يخرّب بيتك يا حديدي... الواد ابن اخت

السعدان

متكتف ومرمى بره يا باشا

الحديدي

الرئيس

الحديدي

الرئيس

الحديدي

الرئيس

الحديدي

الرئيس	قبضتوا عليه إمتى
الحديدي	النهارده الفجر يا باشا... كان ماشى ومعاه رزمة المنشورات
الرئيس	والمنشورات
الحديدي	متحرزه يا باشا
الرئيس	دخل لى الواد والحرز
الحديدي	(يؤدى التحيه ويخرج ثم يعود بفارس متكثف بالحبال)
الرئيس	سيينا لوحدنا يا حديدي (يخرج الحديدي)
فارس	يرضيك كده يا باشا
الرئيس	إخرس... إنت يا ولد ماشى توزع منشورات
فارس	كذب يا باشا
الرئيس	والحرز ده؟
فارس	إفتحه يا باشا
الرئيس	(يفتح رزمة الورق ويقلب فيها) ده ورق أبيض (يضغط الجرس فيدخل الحديدي ويؤدى التحية)
	هى دى المنشورات يا حديدي؟
الحديدي	هى يا باشا
الرئيس	ده ورق أبيض يا حمار
الحديدي	أيوه يا باشا لكن هو إعترف

اعترفت بآيه يا راجل يا ضلالى	فارس
ولد إوعى أسمع صوتك تانى.. أيوه يا حديدى	الرئيس
المخبر يا باشا لما مسكه بيغفرق الورق الأبيض ده	الحديدى
ع الماره سألته بتفرق إيه قاله بافرق منشورات قاله	
أمال مش كاتب فيها حاجه ليه قاله حاكتب إيه	
والا إيه يا ولاد الكلب.. يا ولاد الكلب يا باشا	
فك الولد يا حديدى	الرئيس
(يقوم بفك الحبال عن فارس)	الحديدى
اتفضل انت يا حديدى (يخرج الحديدى) ااعد	الرئيس
يا ولد	
براهه يا باشا	فارس
اسكت يا ولد ما تبقاش متسرع زى خالك.. هنا أنا	الرئيس
بس اللى أتكلم وكلكم تسمعوا.. أنا لما كلفتك بالدور	
اللى لعبته مع المره عجائب كنت باشرفك	
بالتكليف ده.	
أرجو إنى أكون...	فارس
(مقاطعاً) ولد أنا قلت تسمع وانت ساكت.. الراجل	الرئيس
الحمار اللى اسمه أبوالوفا الحلوانى قل بأصله معايا	
وراهن على مره.. طب أهى المره ضيعت الدنيا	
عشان عيون واد هلفوت زيك.. إنت بقى خليك	

مطرح أبو الوفا الحلواني إيه رأيك مش ترجع بقى
تبعث الدعم لنا .

فارس يا باشا أنا عايز أطير أنا ماليش دعوة بالحواديت
بتاعتكوا دى

الرئيس حواديت بتاعتنا؟ أما إنت ولد عديم الربايه صحيح
فارس وعد الحردين عليه يا باشا وانت اللى علمتنا كده
يا باشا

الرئيس يا واد افهم ما تبقاش حمار زى خالك داير ورا
عجائب وفاهم انى مش عارف! ام الشحات خدت
مقاولتها قرشين حلوين وحترتاح باقى عمرها
وانت إختار تشتغل مع الحديدى فى المباحث ولا
تاخذلك قرشين تلعب بيهم فى السوق .

فارس أنا لا عايز اشتغل مع الحديدى ولا عايز ألعب فى
السوق أنا عايز أطير يا باشا .

الرئيس يظهر إن الذوق مش نافع معاك إسمع يا ولد .
فارس قبل ما تكمل يا باشا أنا ح أطير يعنى ح أطير ح
أسافر أمريكا أدرس طيران وحتدفعولى المصاريف
على داير المليم ده اتفارقنا .. ده حقى وأنا مش ح
أسيب حقى .

الرئيس الله .. داخنا بقينا صحاب ويتقاطعنى ويتقول حقى

ومش حتى طب قسماً عظماً لا انت شغال عند
الحديدى ولا انت لاعب فى السوق ولا انت
طاير.. ولو سمعت ان نفسك على لاخفى جنتك
انت وامك والديوس خالك ولا أخلى الدبان الازرق
يعرف لك طريق جره.. يعنى ح أمسح أساميكو
من السجل المدنى انت مجرد عميل ونهايتك فى
صفيحة زباله... لكن أنا غلطان إنى أكرمتك
عشان خاطر خالك الابهل أبورياله الغبى أخرج
بره .

(يخرج)

فارس

هنا أنا بس اللي أتكلم... وكلكوا تسمعوا (فارس
يعنى متقفله فى وشى البيبان)

الرئيس

متقفله

وفارس وخاله

متقفله ف وشى البيبان
متقفله ومتسمره
والدنيا زى الكستبان
شايف قفاها من ورا
أعشق ملاك
يطلع شيطان

فارس

أزرع قصب
يطلع دره
الله يجازيه الزمان
خلانى مسخه ومسخره



أنا اللي حظى شيش وبيش
أعمى نظر ومبصليش
وأنا اللي خلّيت من مفيش
وعملت ضهرى قنطره
ساعة ما بحتاج الطريق
كل السكاكى مسكره
ويوم ما آمن للصدىق
يطلع لى بالليل م الدره
متقله ف وشى البيبان
والدنيا زى الكستبان
ملعون أبوك يادى الزمان
خلّتنى عيـره

ومعيـره

حلق حوش

(فى منزل عجايب - سهرة حمراء - السعدان
يىاجى نفسه أملاً فى انتظار دخول عجايب)
والله وباضت لك فى القفص ياسعدان يا لارق
يابن فرحانه التشة .. كانت الله يرحمها دايمأ
تقوللى .. انت يا واد يا سعدان دونا عن اخواتك
التمتاشر نازل فى برنس ويوم ما اتولدت رجع
عقل أبوك فى راسه وطلق ضرايرى الثلاثة .
تعالى بقى يأمه وشوفى الأمله اللى بقى فيها ابذك
أول هام جانى أربع نسوان الواحده منهم توزن
جاموسه عشار وأولهم اخت الباشا ذات نفسه .
تانى هام عجايب اللى رقصت كقرسين على
واحده ونص بقت بتاعتى خلاص .. لى أنا

السعدان

لوحدي.. لا فارس ولا حارس ولا حتى الباشا
بزي ماهو.. السعدان لعجائب.. وعجائب للسعدان
(تدخل عجائب راقصه مغنيه تحمل زجاجة خمر
ضخمه)

حوش السعاده سا سعدانى
حبك سكرنى وصحانى
حلق.. هواك علق قلبى
زى الحلق.. آه يا ودانى
سعدانى آه

قوم حلق حوش

سعدانى لأ

ماتزعلهوش

سعدانى آه سعدانى لأ

فلقل يا عزول م الغيره وطق

سعدانى يا سيعه يا سعدونتى

حوش الهاموش عن بلكونتى

حلق عليه انت ونينتى

ماتخليهوش يرجع تانى

سعدانى آه

قوم حلق حوش

سعدانى لأ

ماتزعلهوش

سعدانى آه سعدانى لأ

فلقل يا عزول م الغيرة وطق

السعدان (فى حالة سكر بين) آه يا نن عين السعدان يا
فتالة القتلا.. بقى والنبي مش حرام الحسن دا كله
كان محبوس ورا بنك البقاله وطول النهار غرقان
فى شرش الجبنه ومتلغمط زيتون وطحينه وبلاوى
زرقا... وآخر الليل يترك ع الرف مش حرام يا
عالم! (يرقص ويغنى) سعدانى آه قوم حلق حوش
سعدانى لأ ما تزعلهوش.. طب وهو أنا أستجرى
أزعله.. دا أنا أزعل الدنيا بحالها وهو لأ.

كلام عجائب

وفعل وحياء عينيكى الحلوين دول السعدان

ماشفتش عجائب

ادى إحنا فيها السعدان

دا الكلام دا من إمتى ياسعدانى عجائب

من أيام الهشك بشك ياروح سعدانك أيام الحظ السعدان

والفرشه كانت أيام مفترجه الله يجازى اللى كان

السبب

عجائب
السعدان
وتفتكر مين اللي كان السبب يا سوسو
ما تخلينا هنا يا روح سوسو... هي ساعة الحظ
بتتعوض (يرقص ويغنى) سعدانى آه سعدانى لأ
فلفل يا عزول م الغيره وطق (ويصرخ) ياناس أنا
ف حلم ولا ف علم.

عجائب
السعدان
سعدونتى
حبة عين سعدونتك من جوا
عجائب
السعدان
ح أقولك حاجه بس ماتزعلش
أنا أزعل منك انت... طب على الطلاق بالثلاثة
من نسوانى الأربعة ان ضرب الرصاص منك
انتى ما يطرف عيني

عجائب
السعدان
أنا مش ح أقدر أستقبلك هنا تانى... احنا بقى لنا
ع الحال دا يجى شهروجيرانى عينيهم متفتحه لى
ولا يكون عندك فكر.. م الصبح أأجرلك شقه
مفروشه فى أجدعها حى فيك يا كفر سين

عجائب
السعدان
(تتصنع الغضب) طب إوعى بقى أنا مخصماك
ياالهو بالى.... طب وأنا أقدر على كده؟
عاييز تأجرلى شقة مفروشه زى أى واحده من

عجائب
السعدان
إياهم! هي دى قيمتى عندك يا سعدانى
أنا يا بنت الناس مش عرضت عليكى أطلق إثنين

من الأربعة وأتجوزك على سنة الله ورسوله؟

عجائب . وأنا قتلتك طلق الأربعة

السعدان مانتى عارفه الإثنين الباقين يبقوا أصحاب المال

وأمهات العيال وواحد منهم أخت سيادته ومع

ذلك دول جاموستين.. إيش جاب لجاب

عجائب يبقى خلاص بقى كل واحد مننا يروح لحاله -

انت ترجع لنز....

السعدان خصيمك النبي ماتكلمى.. اللى يريحك قولى عليه

وأنا على التنفيذ

عجائب مانتاش خايف؟ (تضغط على زرار تشغيل مسجل

صغير لا يراه)

السعدان من مين

عجائب يعنى مثلا لو طراطيش كلام وصلت للباشا

السعدان ولا الباشا ولا غيره له عندى حاجه - الباشا بياخذ

البابى بتاعه كل سنة على داير مليم - وهو ده اللى

له عندى... إنما كلام تانى مالوش وإن كان على

أخته أنا مستتها وخابيتها ومعيشها فى قصر ولا

قصر الباشا ذات نفسه... ثم أنا سبق واتجوزت

عليها

عجائب الجواز شىء واللى بيننا شىء تانى ياسعدانى

السعدان اللى بيننا أقوى م الجواز وأقوى م الموت ذات نفسه
يا حبة عين سعدانك

عجائب لكن أنا مش متطمئه برضه

السعدان تحبى اكتب لك عمارة بزى ما هى

عجائب إخص عليك... أنا برضه بتاعة كده؟ (تتصنع

البكاء) صحيح يا مآمنة للرجال يا مآمنة للميه فى

الغريال... بقى علشان أنا وقعت ف حبك تقوم

عاوز تشترينى بفلوسك وعماراتك (تبكى)

السعدان أنا حمار وإبن حمار- أنا أستاهل ضرب النعال

(يخلع حذاؤه ويضرب به على رأسه) أنا حمار

عجائب (تأخذ منه الحذاء) ماتعملش فى نفسك كده

ياسوسو.. أنا دلوقت بس إتأكدت من حبك لى-

ماتعملش فى نفسك كده إخص عليك

السعدان إخص واحدة؟ قولى مليون إخص... قال عماره

قال هى دى بتاعة كده يا حمار يا بن الكلب

عجائب خلاص يا حبيبي (تغنى) سعدانى آه سعدانى لأ...

فلفل ياعزول م الغيره وطق (تضع له شيئاً فى

الكاس فيشره وهو يرقص ويغنى)

السعدان سعدانى آه سعدانى لأ

عجائب أنا جت لى فكره إيه رأيك لو آخذ خلورجل فى

- السعدان السوير ماركت أشتري بيه بيت بعيد عن هنا
عفارم على أفكارك الجهنميه... لكن وأنا إيه اللي
حيزيليني أستنى عبارة السويرماركت.
- عجائب وأنا أعمل إيه بس يا سعدونتي
- السعدان انتى تشوفى البيت اللي يعجبك وأنا دفاع
- عجائب تانى يا سعدون ح تجرح إحساسى بالكلام ده؟
- السعدان طيب صرفينى انتى يا روح سعدونتك
- عجائب آخدهم سلف
- السعدان ماشى كلامك... عايزه كام
- عجائب وأنا إيش عرفنى أسعار البيوت
- السعدان تاهت ولقيناها انتى تاخدى آهه (يخرج من جيبه
دفتر الشيكات) شيك على بياض ولما تشوفى
البيت تحطى فى الشيك المبلغ المطلوب
- عجائب يا حبيبتي يا سعدونتي قد كده بتحبينى
- السعدان وأكثر من كده بكثير (يبدأ فى النوم) كثير كثير
قوى (يعلو شخيره)
- عجائب (تضحك) نوم الظالم عباده... نام يا ديب. نام
يامصاص الدم يا خنزير.. ودلوقتى روحك بقت
فى إيدى.. لكن أنا مش حأمورتك.. أنا ح أسيبك
تعيش بعاهه عشان تبقى عبره للى زيك لو كان

كمونه هنا وقبل يخش في اللعبه معايا كان بالكثير
قوى كتب خمس تلاف جنيه فى الشيك .. لأنه
فقير والفقير دايماً سقفه واطى .. أنا بقى ح أكتب
٣٠ مليون جنيه بس يعنى ثلاثين أرنب أنا مش
طماعه .. ولا خاينه أنا بنت وفتى .. والوقت وقت
الأرنب ... والحكم حكم الأرنب والرأى رأى
الأرنب خلاص راحت عليك يا زناتى يا خليفه
وفوت علينا بكره يا عنتر عبس يا خايب أرنب
ولى زمان الليل والخيل والرمح والسيف والقلم
والقرطاس والبقية ف حياتك يا هلالى يا سلامه
خلاص .. تموت بحسره يا عديم الأرنب وان مت
يا غلبان لا يمر نعشك على جامع ولا كنيسه ولا
بنيان ولا بيكى عليك انسان ولا يعرف مزارك
حد .. كل الطرق دهاليز كل المسالك سد.

افتتاح سوپرماركت هابى كفر

(سوبر ماركت حديث جداً.. كميات من باقات
الزهور تزحم المدخل.. فاترينات تتألق
بالمجوهرات والبارفانان والملابس الفاخرة
ولافتات النيون المتحركة - هابى كفر

(HAPPY KAFR

(تدخل مسعده مرتديه ملابس بودى جارد وتضع
جرابين مسدسات فى حزام البنطلون الجينز)
(فرقة بنات حديثه تؤدى استعراضاً حديثاً أمام
السوبر ماركت)

الجفة النغة ياحلوانى
حسك ماتهورب هنا تانى
بخـرنا البـبيت

مسعده

ودلقتنا الزيت .
 وقدحنا الزبدة السلطاني
 التمشى التمشى التمش
 إتفش ياقلبي وفش
 دورت فى سوقك مالقيتش
 غير فردة جزمه بلبسه
 لميت رسمالى ماخليتش
 وعملت فى حبك تفليسسه
 النأ النأ النأ
 تحايلنى وأقولك لأ
 (يدخل الحديدى وأبوصفيحه على راس قوة أمن
 وكلاب بوليسية لاسكى)

الحديدى

هابى ماركت هو اللى كايدهم
 هابى ماركت للناس القيمه
 تكثر فوايدنا وفوايدهم
 هابى ماركت أجدع م السيمما
 السح السح السح
 هابى ماركت هو الصح
 هابى هابى كفر.. مجوهرات
 هابى هابى كفر.. بارفانات

هابى هابى كفر.. ملابس داخلية
هابى هابى كفر.. آيس كريم بالصودا
(قوة الأمن تكون قد انتشرت أبوصفيحه يكون قد
انتهى من تأمين المكان)

الحديدى كله تمام
أبوصفيحة تمام التمام يا باشا
الحديدى أنا عايز عنيكو مفنجله.. وامر منى.. أى اشتباه أو
حركة اضرب فى المليان على طول
أبوصفيحة حاضر يا باشا

الحديدى أنا مش ح اطمن ولا يهدى لى بال الا اما يعدى
النهارده على خير

أبوصفيحة باذن الله يا باشا.. اتظمن سعادتك.. ماتخافش
(أبوصفيحة يتذكر فيضع يده على خده)

الحديدى اليوم يومك يا أبوصفيحه
أبوصفيحة بنفسك يا باشا.. (صوت سرينه خاصه)

الحديدى انتباه
(القوه تتجمع لتؤدى التحيه العسكريه بينما تدخل
عجائب مرتدية ثياباً فاخرة وباروكه - الحديدى

يتقدم منها فتعطيه يدها فيقبلها)

عجائب كله تمام يا حديدى

الحديدى	(ينحنى) تمام يا ست الكل
عجائب	طب يا لله امشى شوف شغلك
	(ينتشرون بينما عجائب تتوجه الى السويرماركت)
عجائب	كله تمام يا مسعده
مسعده	السطه يا أبلتى (متداركه بعد زغره من عجائب)
	أوكى يا مدام ..
عجائب	طيب يا لله .. أحسن الراجل على وصول
	(موكب الرئيس... الشحات على رأس مجموعه
	من الهتيفه ويرددون)
	الباشا وصل
	يا حلاوه عليه
	وحصل ما حصل
	من صنع إيديه
	عين وفصل
	ولا قلناش ليه
	وعزولنا بصل
	وتراب ف عينييه
	والباشا وصل
الرئيس	(يدخل فتسارع عجائب الى الانحاء وتقبيل يده)
الرئيس	عفارم .. كده الشغل ولا بلاش .. ايه الحلاوه دى

عجائب	(فى دلال) أنا والا السوير ماركت
الرئيس	انتو الاتنين ما تتخيروش عن بعض
عجائب	كل ده بفضل رضا سيدنا وحامينا
	يدخل كمونه وقد طالت دقنه على رأس مجموعه
	من الشعب الكادح)
كمونه	(صارخاً) وصلى صلى
المجموعة	صاالى
كمونه	ع النبي صلى
المجموعة	صاالى
كمونه	واللى ما يصلى
المجموعة	صاالى
كمونه	امه يهوديه
المجموعة	صاالى
كمونه	وأبوه أرملى
المجموعة	صاالى
الرئيس	(للحديدى) الواد ده طلع إمتى م الحجز يا حديدى
الحديدى	طلع ف العفو بنص المده يا باشا
الرئيس	أيوه أيوه النهارده العيد القومى بمناسبة افتتاح
	هابى كفر
كمونه	وصلى صلى.. أمه يهوديه

- الرئيس
كفاية كده يا واد انت ما تزودهاش
كمونه
اقل منها يا تاج راس البلد.. دانت باشاره من
صباeck الصغير بتغير نظام الكون وخط سير
البنى آدمين
- عجائب
(تشعر بالتلميح من كمونه) إسمها بيصح خط
سير المخاليق يادكتور
- كمونه
كل واحد وقناعته يا دكتور
- عجائب
اللى يعرف بابايا يروح يقوله يا دكتور
- الرئيس
جرى إيه انتوا حتنناقشوا فى الطب ولا إيه؟..
حديدي.. نصف.. (الحديدي يشير لرجاله
فيخرجون كمونه ومن معه)
- عجائب
(تقدم المقص على طبق ذهبى ليقص الشريط
وسط أضواء عدسات التصوير) ماتعكرش دمك
ياباشا.. اتفضل قص
- الرئيس
(يقف لالتقاط الصور وسط الحضور فيفاجأ
بالسعدان يدخل فى حالة عته ويندس وسط
الحضور وهو يصيح)
- السعدان
كتفت إيدي بايدي والسلب منى.. وقليل الأصل
عمل فيه فصل جننى
- عجائب
(تتصنع الخوف فتلتصق بالرئيس فى وضع مذل

فتتوالى أضواء العدسات؟

الرئيس
الحديدي

إيه ده؟ مين اللي دخل المعتوه دا هنا؟ يا حديدي
أفندم سعادة الباشا

الرئيس
الحديدي

إيه المناظر دي... انت عايز تشوه جمال الاحتفال
دا راجل مجذوب يا باشا

الرئيس

يقعد فى بيتهم

عجائب

ولا يقعد فى مستشفى

الرئيس

ولا يقعد على خازوق

عجائب

ماهو قعد يا باشا (يدقان الكف)

السعدان

وقمت تانى ياغزیه.. قمت تانى علشان أكل

زمارة رقبتك (يهجم عليها ويشد فستانها فتصرخ

وتختبىء خلف الباشا الذى يبدو عليه الذعر لولا

تدخل الحديدي ورجاله الذين ينقضون على

السعدان ويكتفونه)

السعدان

سيبوني يا كلاب السكك يا مسعورين

الباشا

(فى زعر) اوعى تسيبه يا حديدي (ثم للسعدان)

بتتهجم عليها وهى جنبى يا كلب.. انت نسيت أنا

مين وانت مين؟

السعدان

لا ما نسيتش يا باشا.. أنا لسه فاكر أصلى من

فصلى الدور الباقي عا اللي نسى.. يا ابن أبولحاف

الباشا

بتقول ايه يا ولد

الحديدى

ده بيخرف يا باشا .. عيب اختشى يا لازق

السعدان

(مناجيا نفسه) كنت فى زمانى سلطان زمانى ..

دنيا يا دانية ومقربانى .. وكان زمانى آه

يا زمانى .. لحد ما المكتوب زمانى .. دنيا غروره

زى الغزیه .. ضحكت لى ضحكه ضحكت على ..

شخسخت جيبى وفضحت سرى وكشفت عيبي

من نقل خيبتى .. والعيبه عيبتى .. والخيبه

خيبتى .. وانا اللي جبت الخراب بايدى ..

كتفت ايدى بايدى والسلب منى وقليل الاصل

عمل فى فصل جننى .. عقبالك يا حديدى ..

عقبالكو كلكو .. وعقبال اللايم وعقبالك يا باشا

(يضحك بهستيريا) واونى تفكر انك حتقلت ..

طول ما انت طبان طول ما الزمن زمار .. والحجر

الداير لا بد من لظه .

(نسيبوه للخارج)

كتفت ايدى بايدى والسلب منى

وقليل الاصل عمل فى فصل جننى

(عجايب تهمس فى اذن الباشا)

ممنونه لك يا باشا .. لولا حمايتك ورعايتك كان

عجايب

حيموتنى (تمهس بكلام غير مسموع) والباشا
تتسع ابتسامته)

الباشا أنا شاي ف ان لسه بدرى ع الحكايه دى
عجايب بالعكس يا باشا احنا اتأخرنا قوى
الباشا طيب عموما أفضى شويه من المشاغل الاقصاديه
اللى وريا وابقى ارتب ان المسأله
عجايب أنا مستنيه اليوم دا زى هلال العيد
الباشا إنتى بتجيبى الكلام الحلو دا منين؟ (الحديدى
يشير للجمع بالانسحاب لاخلأ الجول لعجايب
والباشا)

عجايب الحب يا باشا.. حبك علمنى كل حاجه حلوه
الباشا يا بت يا بكاشه
عجايب طب بص فى عنيه كده واقرا
الباشا (ينظر فى عينيه) كلها رجاله
عجايب راجل واحد بس..
الباشا واسمه الباشا؟
عجايب طب ما انت بتعرف تقرا اه
الباشا الحب يا عجايب.. حبك علمنى القرايه على كبر
عجايب (تمد له يدها) بعده يا باشا (بدقان الكف)
ويكره تاكل بغاشه

الشحات ومسعده فى هابى سوبر

هابى كفر تشع منه الفخامه لكنه شبه مهجور ليس فيه سوى مسعده والشحات الذى لا يترك الكتاب من يده .

مسعده طب وايه رأيك فى عادل وجدى

الشحات دا اسم نجم سنمائي ده يامسعه

مسعده وهما يعنى بتوع السيما كانوا اشتروا الاسامى؟

طب ما أنا بقى اسمى سودى

الشحات ويعدين حكاية الاسم دى مالهاش أهميه

مسعده مالهاش إزاي ياواد.. إحنا دلوقتى مش فى درب

الغوازى.. يعنى الزباين إتغيرت قدر إنك حلّيت

ف عين زبونه من إياهم وسألتنى عن إسمك..

أقول لها الشحات

وماله .. مش يمكن تطلع زيونه محسنه	الشحات
(تضحك) داننت بلوى مسيحه .. وازاى امك	مسعده
بخير بتبوس إيدك	الشحات
أمك دى ياستار منها	مسعده
الظروف يا مسعده قصدى ياسودى	الشحات
ياخويا سيب الكتاب ويص ف وشى .. الكتب دى	مسعده
فيها إيه	
كل اللى يحتاجه الإنسان فى الكتب	الشحات
طب ياخويا أنا محتاجه أرنبين ثلاثة	مسعده
حتعملى بيهم إيه يامسعده قصدى ياسودى	الشحات
حاكل كل يوم سلمون ... قال ح اعمل بيهم ايه ...	مسعده
بس هات وانا أوريك (يدخل الحديدى فينسحب	
الشحات الى الداخلى)	
صباح الفل على حبيبة ست الكل (تعطيه يدها	الحديدى
فينحنى ويقبلها)	
إزيك يا واد يا حديدى	مسعده
مش ناقصنى إلا رضاك يا جميل	الحديدى
كذاب وابن كلب زى صنفك كله	مسعده
طب إقرى اللى مكتوب فى عينيه	الحديدى
مادخلتش المدرسة ياروح امك	مسعده

- الحديدي
مسعده
احسن .. يعنى هي عجائب كانت دخلت مدرسه
انت كل ما تكلمنى تحشر سيرة عجائب فى الكلام
ليه؟ تكونش بتحبيها هي
- الحديدي
مسعده
أنا باحب واحد بس .. واحد مالوش تانى واسمه
- مسعده
سودى ياروح امك هات م الآخر يا حديدي .. انت
تعبان وأنا حيه
- الحديدي
مسعده
(ضاحكاً) ومبروم على مبروم؟
مايفش ياروح خالتك
- الحديدي
مسعده
فيه تغليته ع الحدود .. طالع لى فيها أنا وانتى
نص أرنب بحاله
- مسعده
يعنى كل واحد فينا أرنب
- الحديدي
سهله قوى .. عموماً خدى انتى النص أرنب وأنا
ألقط عيشى من بره
- مسعده
أرنب وما تضيعيش وقتى ع الفاضى
- الحديدي
مسعده
ماشى كلام الفعلا على البنايين
والمطلوب منى
- الحديدي
مسعده
تفضى لنا المخزن العمومى قبل الساعة إتناشر
طب اخلع أحسن الشحات جاى (يخرج)

الشحات

أنا شاييف ان الحديدى واقع على سنانه

مسعده

ماله هو الحديدى وحش

الشحات

ياه .. دانتي دماغك كبير قوى يا مسعده

مسعده

يابنى شغل مخك بقى .. الله يرحمك يامه كانت

تقوللى يابت ياسودى لو لقيتى بلد بتعبد العجل ..

حشى وإرمى له

الشحات

When you are in Rome do as Romans Do

هوين يو آر إن روم دو آز رومانز دو

قلیلا عجایب

(رکن من الحدیقہ وعجایب تجلس علی أرجوحہ

فی استرخاء وکمونہ یقف أمامها)

(ینظر الی عجایب بوجد صامت فترتیک) إزیک

یا عجایب

کمونہ

(بتوتر) زی ما انت شایف

عجایب

ربنا یحمیک ویحرسک

کمونہ

من مین إن شاء الله

عجایب

من نفسک یا عجایب.. ربنا یکفینا شر أنفسنا

کمونہ

(تزداد توتر) کمونہ - ماتعملش علی حکیم.. وفر

عجایب

نصایحک علی نفسک

أنا مش جای أنصحک یا عجایب.. أنا جای

کمونہ

أعرض علیکی مشروع

- عجائب
كمونه
هىء مشروع حب ولا مشروع جواز
لا.. دا كان زمان بقى الكلام دا.. زمان كان من
حقى أقولك باحبك ولو فى سرى وكان من حقى
أحلم بانى أتجوزك.. زمان يا عجائب.. انما
دلوقتى خلاص.. اللى يبص لفوق توجهه رقبته
- عجائب
كمونه
كمنى... سكتى ليه؟
أنا عايزاك تفهم أنا عملت كده؟
- عجائب
كمونه
وأنا مش عايز أفهم حاجه.. إنتى حره إعملى اللى
إنتى عايزاه
- عجائب
كمونه
(بتوتر) طبعاً اعمل اللى انا عايزاه.. واللى يعرف
أبويها يروح يقول له
- عجائب
كمونه
هدى اللعب يا عجائب... ما حدش بيعد عليكى
الغلط.. الناس كلها بتحبك وحتفضل تحبك
- عجائب
كمونه
لسه ح تقوللى الناس.. أمال مين اللى دبحنى
ياكمونه
- عجائب
كمونه
خلاص نقتل الموضوع ده دلوقت
نفسى أشوف الناس بتوعك دول مرة واحده
- عجائب
كمونه
أديكى حتشوفيهم.. لما تباركى المشروع
مشروع؟ مشروع إيه إن شاء الله

مشروع العهد يا عجايب .. العهد اللي بينك وبين	كمونه
السيد أبو الوفا الحلواني الناس حتوفيه بدالك	
يعنى إيه؟ مش فاهمه حاجه	عجايب
الناس حتفتح سوير ماركت العهد	كمونه
كمونه .. وطى صوتك	عجايب
اللى بيزمر ما بيغطيش دقنه يا عجايب	كمونه
حيضربوكرا زى ما ضربونى	عجايب
ما يقدرش	كمونه
أمال قدروا يضربونى إزاي؟	عجايب
عشان كنتى لوحديك	كمونه
يا غلبى من دماغك الناشفة دى .. يا كمونة أنا	عجايب
خايفه عليك طاوعنى .	
ما تخافيش على طول ما إحنا يد واحدة	كمونه
واللى يراهن ع الناس ما يحتاجش لحد يا عجايب ..	كمونه
والمشروع بدأ بالفعل وبكره الناس تعرف مين اللي	
وقف مع المشروع ومين كان ضده .	
وأنا مش ح أدفع ولا مليم	عجايب
ليه؟ خايفه	كمونه
ما تسألنيش ليه	عجايب
لأ لازم أسألك	كمونه

عجائب بأمانة إيه
كمونه (يخفض صوته) بأمانة إني لسه باحبك

ياعجائب

عجائب باقولك ايه أنا اللي في مكفينى.. واتفضل بقى من
غير مطرود

كمونه (بانكسار) تانى يا عجائب (ينسحب مطاطى
الرأس)

عجائب كم.. لأ بلاش (تنهار على المقعد وتنخرط في
البكاء) أعمل ايه ياربى.. أروح فين واجى منين؟

توهه.. مطرح ما أدير وشى مالقاش الا التوهه..
توهه توهه.. فين طريقك يا شاطر حسن باتباع

الحواديت.. سكة السلامة ولا سكة الندامه.. ولا
سكة اللي يروح ما يرجعش.. آه يا وحدتى يانا..

(صوت فارس من خارج السوبر ماركت يغنى
وحدك وأنا وحدى)

فى مكان ويظل الضوء مركزاً على عجائب فى
جزء من الأغنية)

وحدك وأنا وحدى

أبكى ساعات واحدى

طوال السفر والليل

ياغـرـبـتـى وـحـدى
صـحـرا وانا جـمـال
شـيـله وانا شـيـال
قـصـه وانا مـوال
غـرـبه وانا وـحـدى
ياهمـسـة النـسـمـه
يازهـرة الصـبـار
ياخدودك الشـتـوى
ياعيونك الانهار
طول الخريف عمرك
بين الحنين والنار
بتلونى الأحلام
وتفتحى النوار
وأنا خـرـيـفى دـوم
بين العطش والصوم
لالى جلدع النوم
ولا السهر وحدى

اجتماع المشروع

- فارس
كمونه
يادكتور ماتوحد الله أمال
لا اله الا الله .. آخر حاجه كنت أتصورها ان
عجائب تطردنى تانى
- فارس
كمونه
انت واخذ الموضوع بشكل شخصى ليه؟
اللى كان بينى وبين عجائب يا فارس صعب
يتوصف وصعب يتنسى.
- فارس
كمونه
أنا مش عايز الصدمه دى تفقدك حماسك
للمشروع
لا يا فارس المشروع حيتم بمساعدة عجائب
وبلاها.. المشروع ده حلم كفرسين.. وأنا اللى
حنفسر الحلم.. ودى مسئوليه واحنا لازم نكون
قدها

- فارس (يحضن كمونه) قدما وقدود يا عترة كفرسين
- كمونه (بيكى تأثراً) البركه فى الشباب
- فارس وانت أبو الشباب ياعم كمونه .. أنا واحد م الشباب
اللى صحيتهم وعلمتهم ونورتهم - انت اللى بدأت
وانت اللى حتكمل واحنا معاك ان شاء الله
- كمونه اتغيرت يا فارس
- فارس اللى يشوف ويفهم الحاصل فى البلد دى
ومايتغيرش يبقى يروح يدفن نفسه بالحيا .. والا
ايه يا حكيم
- كمونه يسلم بقك يا أبو الفوارس
- فارس زمان سمعت منك عبارة كنت فاكرها هزار
أتاريها عين الجد .. تصور ما فهمتهاش الا اليومين
دول بس
- كمونه خيرا ان شاء الله .. عبارة ايه ؟
- فارس الخشب بيقول للمسمار انت مالك نازل فى لحمى
تقطع كده قال له .. من الدق اللى نازل على
دماغى
- كمونه (يضحك بشدة ويحتضن فارس) ده انت بقيت
فيلسوف كمان ربنا يحميك ويكثر من أمثالك
صوت الشحات خارج الباب - ميم .. سين .. ميم ..

كاف.. سين

دا الشحات

كمونه

(يفتح الباب) حد شافك؟

فارس

عيب يابو الفوارس (يتجه نحو كمونه ويقبله)

الشحات

اوعى تكون زعلت من عجائب.. دنا سايبها

دلوقتي فى حاله وحشه.

(بلهفه) مالها عجائب يا شحات

فارس

خلونا هنا بقى.. نتكلم فى الشغل

كمونه

أنا مش ح أقدر أتأخر عن عجائب (يخرج من

الشحات

جيبه مظروف) خد دى حصيلة الدفعة الثالثة من

اكتتاب حارة أبو لحاف وفيه دفعه جايه بكره.

(يتناول منه المظروف) وماتنساش تفوت ع

فارس

الغوريه.. النهارده ميعاد التسليم

وجب يابو الفوارس.

الشحات

وخلى بالك من نفسك.

فارس

خلوا بالكوا انتو من نفسكو.. خلى بالك من الدكتور

الشحات

يا فارس.

خلى بالك من عجائب يا شحات

كمونه

ماتوصيش حريص يادكتور (يخرج)

الشحات

(صوت السعدان من الخارج)

كسفت یدى بایدی والسلب منى وقليل الاصل
عمل فى فصل جننى .

فارس
كمونه
لازم مطرح المسائل بوضوح فى اجتماع الليله .
ونقول لهم عجائب خذلت ولاد بلدها؟ لا يا فارس
شوف حل تانى

فارس
كمونه
مافيش حل تانى غير اننا نطلب مساعده م السيد
أبولوفا .

فارس
كمونه
وبأى وش حنقابه بعد ما عجائب خانت العهد اللى
انا كنت شاهد عليه؟

فارس
كمونه
طب دبرنى ياوزير .
التدابير لله ياملك . ما فيش غير انى أبيع هدومى .

فارس
كمونه
(ضاحكاً) وتمشى حافى ياوزير؟

فارس
كمونه
فضلة خير عهدك يامولانا (يضحكان)

فارس
كمونه
عموماً فيه خبرين مشجعين جابهم الشحات
النهارده .

فارس
كمونه
هات الأول .

فارس
كمونه
الكفر الشرقى والكفر البحرى بدأوا فعلا فى زراعة
وتصنيع المواد الأساسية عشان نواجه حصار
التجار الكبار .

فارس
كمونه
والخبر التانى

المركز الرئيسي حيثم افتتاحه فى ميعاده .. ودا فى رأى هو المهم .	فارس
والمراكز الفرعية ؟	كمونه
الشحات بيقترح تأجيل فتحها بسبب عجز التمويل اللى نتج عن موقف عجائب .	فارس
الولد ده يافارس يابنى كل ما باشوفه باتطمئن إن الدنيا لسه بخير .	كمونه
الدنيا مليانه خير يا حكيم . بس الناس تفوق وتدور جواها حتلاقى قوه وطاقه لو استغلوها يقدرُوا يواجهوا بيها الدنيا .	فارس
(خبط شديد ع الباب)	
إيه ده ؟	كمونه
مين ؟	فارس
افتح .. احنا البوليس .	صوت
(يفتح الباب فيندفع أبوصفيحه وخلفه عدد من المخبرين داخل المنزل)	فارس
(يمسك كمونه) هو دا يابيه	مخبر
إرعى - نزل إيدك لاكسرهما لك .	كمونه
بيت مين ده ؟	أبوصفيحة
بيتى .. فيه حاجه ؟	فارس

أبوصفيحة	وايه اللي مقعد كمونه عندك .
فارس	صاحبى
أبوصفيحة	(لكمونه) اتفضل معانا
فارس	يتفضل معاكو على فين؟
أبوصفيحة	والله ما أعرفش دى أوامر الحديدى بيه .
كمونه	ولو سألت الحديدى بيه حيقولك دى أوامر فلان
	ببيه ولو سألت فلان بيه حيقولك دى أوامر فلان
	باشا ولو سألت فلان باشا حيقولك دى أوامر الأمير
	فلان ولو سألت الأمير فلان حيقولك دى أوامر
	السلطان فلان ولو سألت السلطان فلان حيقولك
	دى أوامر رئيس مجلس الأمن ولو سألت رئيس
	مجلس الأمن حيقولك دى أوامر الرئيس كلينتون
	ولو سألت الرئيس كلينتون حيقولك دى أوامر
	النظام العالمى الجديد .
فارس	طب ممكن أعرف تهمة إيه؟
أبوصفيحة	برضه ما أعرفش
فارس	أمال انت بتشتغل إيه بالضبط .. كماشه؟
أبوصفيحة	اتكلم كويس وما فيش داعى لقلة الأدب .
كمونه	خلاص يافارس يابنى .. أنا جاى معاكو
	يا عبد الجبار بيه .

مخبر	نفتش المطرح ياباشا.. يمكن نلاقى ممنوعات.
أبو صفيحة	لا خلاص مافيش داعى (يصطحبون كمونه ويخرجون).
فارس	(وحيداً) ياترى المره دى حيلفقولك تهمة إيه ياعم كمونه؟ كل اللى فات كانوا بيلاقوله أسامى مره إثارة شغب ومره جهر بالصياح ومره تحريض ومرة تنظيم.. ياترى المره دى حيقولوا إيه.
صوت السعدان	كتفت إيدى بايدى والسلب منى وقليل الأصل عمل فى فصل جننى.

فارس وعجائب

(سوبر ماركت - هابى كفر.. عجائب تجلس على الكيس)

فارس (يدخل وهو يحاول اخفاء ارتبائه) مساء الخير..
يتجه نحو الشحات ويهمس فى أذنه فيبدو
الارتباك على الشحات).

الشحات لازم المدام تعرف

فارس لأ ما فيش داعى.. استأذن وتعالى انت معايا

عجائب فيه إيه يا شحات

الشحات قبضوا على كمنه

عجائب يالهوى مين اللى قبض عليه

فارس أبو صفيحة.

عجائب قبضوا عليه بتهمة إيه؟

وهما يبحثان عنهما عشان يقبضوا على حد.	الشحات
أيوه - إيه السبب يعنى.	عجائب
المشروع طبعاً.	فارس
وهما إيش عرفهم.. دانتر بتشتغلوا فى الكتم.	عجائب
ولاد الحرام ماخلوش لولاد الحلال حاجه.	فارس
أنا لازم أمشى من هنا حالا.	الشحات
تمشى تروح فين.	عجائب
أصل أنا بصراحة شريك فى المشروع وكنت	الشحات
مخبي عليكى ومش عايز أتسبب لك فى متاعب.	
أنا كنت عارفه انك شريك فى المشروع وهارشه	عجائب
حركاتك كلها.	
يبقى رأى الشحات مضبوط ولازم يمشى.	فارس
لا إوعى تقول كده - الشحات معايا وأنا مش ح	عجائب
اتخلى عنه ولا عن كمنونه. ومش عجائب اللى	
تخون العشره.	
آسف يا عجائب أنا ما فهمتكيش.	فارس
يعنى انت كنت فهمتنى قبل كده.	عجائب
أنا عايز أشرح لك موقفى.	فارس
خلينا فى كمنونه.	عجائب
دا هما كلمتين.	فارس

عجائب
ولا كلمه ولا نص نخلص كمونه ويعدين ان كان
يبقى فيها كلام.

فارس
عجائب
وحتسميني يا عجائب؟
وايه فايده السمع - زمان كنت باسمعك بقلبي
وعشان كده كنت باصدقك دلوقتي خلاص قلبي
حضن جرحه وقفل عليه لا عاد بيسمع ولا
بيصدق.

(فارس وحيداً يغنى خدينى).

خدينى

خدينى لحضنك الدافى

من البرد اللى مالينى

ياست الحــــسن

يا عشقى

يا بنت الايه

وحشتينى

خدينى لبعده بعد بعيد

خدينى لآخر المواعيد

شيلينى من قديم اسمى

وسمىنى

فمهـد جديد
وانا طيـرك
أطيـر وأكبـر
وأرفرف كل يوم أكثر
واعـدى بحـور
جناح مسـحور
غريب
والغربة حراقه

أتوه منك
وأتوه فيكى
ونتفرق ونتلاقى
وأضيع من سكه للتانيه
وحيد والوحدة خناقه
وأغنيكى وأغنيك

على هبة هوانيك
واقول من شوق مواويك
مسير الحى يتلاقى
خدبلى

غرفة النوم بفيلا عجائب

عجائب والرئيس فى حالة انسجام يغنيان
ويرقصان)

عجائب بصبص لى فى عينى يا بشبوشتى

الباشا ياعيون بشبوشتك من جوا

عجائب عشقانه وخرقانه لشوشتى

الباشا عشقانه المال ولا القوه

عجائب لاتنين وتالتهم بشبوشى

الباشا طب حوشى اللى اتبعتر حوشى

عجائب يا نداشه عليك وانت مشقع

الباشا ياطعامتك وانتى فى غيبويه

الاتين (سويا)

الحب زمان كان بيوقع

- دلوقت خلاص بقى سبويه
(تعب كأسين وتناوله أحدهما)
عجائب صحتك يا باشا
- صحة عجايبي أنا لوحدى (يشريان)
عجائب الباشا
- (بدلأل مصطنع) بشبش..
عجائب الباشا
- نعمين
عجائب الباشا
- أنا عايزة اشتكى لك الحديدى
عجائب الباشا
- اشتكى لى يا روحى.. زعلك فى ايه الكب ده
عجائب الباشا
- هو مزعلنى بس.. دا مزعل كفرسين بحالها
عجائب الباشا
- دى شغلته يا حبيبتي.. أنا معينه فى الشغلانه دى
عجائب الباشا
- وبأدى له مرتبه علشان يزعل كفرسين كلها انما
لوزعلك انتى أنا أشد لك ودنه.
- عجائب (تصب له كاساً آخر) صحة بشبوشى..
- عجائب الباشا
- صحة حبوبى.. هيه.. ما قتلش زعلانه من
الحديدى ليه؟
- عجائب الواد الغلبان اللى اسمه كموه
- عجائب الباشا
- ماله؟
- عجائب دا واد غلبان
- عجائب الباشا
- ده مش غلبان.. ده تعبان.. ده أنا عطفت عليه
وقرنته منى وحميته من غيلان السوق اللى كانو

عايزين يقرقشوا عضمه .. افكرته عايز يعمل له
كشك عطاره يبيع فيه البلابيع بتاعته .. قلت
وماله .. خلى الشعب يبلع ويتكيف .. لكن قال ايه
عايز يعمل سوبر ماركت جديد .. ده احنا
ماصدقنا خلاصنا من سوبر ماركتك ومن عهدك ..
لا وايه .. عامله جمعيه .. سوبر ماركت تعاوني
وبيملك الناس الاسهم يا نهار اسود ومنيل .. الناس
تمتلك الاسهم .. وعلشان كده التهمه لابساره
لابساره .. عمل تنظيم سرى لقلب نظام الحكم بالقوه
المسلحه والاسلحه متحرزه .

عجائب هي أسلحه والا اسهم؟

الباشا أسلحه ومتفجرات كمان .. امال هي النيايه طالبه
له الاعدام ليه؟

عجائب اعدام .. انتو حتعدموا كموه؟

الباشا طبعاً .. امال حنقف نتفرج عليه ونسقف له .

عجائب بس ده ظلم .. ده حرام .. ياظلمه .. يامفتريين

الرئيس بتقولى ايه يامرہ؟ يظهر انك نسيتى نفسك .. انتى

عارفه انتى مين؟ وتكلمى مين!

عجائب عارفه ياباشا ومش لازم تفكرنى

الرئيس لأ لازم أفكرك لانك نسيتى .. انتى حشره دنيله

وانا لميتك من الخرابات وعطفت عليكى وعملتك
بنى آدمه لكن ديل الكلب عمره ما ينعدل.. أنا
لما وافقت إنك تدمرى السعدان جوز اختى كنت
بأدبه لانه خاين زيك وسافل زيك ومالقيتش
عصايه أوسخ منك أضربه بيها - ولما شرفتك
بعلاقتى كنت باقول لنسوانى الأربعة انتوا ديدان
وممكن استغنى عنكم بأدنا وأحط حشره فى
كفرسين.. لكن يظهر انك ما فهمتنيش وتصورتى
نفسك مركز قوه بعض الناس المغفلين بيتصوروا
ان العواطف والهشك بشك ممكن ينسونا حماية
أموالنا ومصالحنا.. لا ياروح امك.. حكاية
العواطف والمقاطف دى إحنا اللى بدعناها عشان
المغفلين يصدقوها.. فاهمه من اللحظة دى
ترجعى عجائب تانى مطيه مباحه لصاحب
القرش ومزيله مفتوحه لكل الفضلات والوساخات
فاهمه (يرميها على الأرض ويخرج)

عجائب

أيوه فهمت.. فهمت قوى.. خالص.. فهمت ان
اللى يخش جحر التعابين يتلدغ بسمهم..

مش هما دول اللى خطفوا اللقمه من بق الجعان
والهدمه من على جثة العريان.. مش هما دول

اللى عملونى شماعه يعلقوا عليها فضايحهم .. مش
هما دول اللى خربوا عش الغريبة وخلونى خنت
عهدى واهلى وحبائيبى؟
وفى لحظة غبائه بعث الناس وعملت خدى
مداس .. دقيت الكذب وصحتته على كفوفى
وسفيته زى الدوا المر .. وعملت بلياتشو ولبست
ميت وش غير وشى وحطيت على قلبى حجر
علشان لا يشوف ولا يحس ولا يدق ولا حتى
يتنفس .. خنت الناس علشان أعيش فى حمى
السلطان .

آه ياكمونه يا صديق الروح والعمر والعقل .. ياما
حذرتنى وياما خالقتك .. كلنا كنا بنغلط وانت
لوحدك اللى كنت صح .. كلنا كنا بنماين وانت
لوحدك كنت زى سيف الحق .. لا ملت يمين ولا
ملت شمال ..

دلوقت بس فهمتك وفهمت ليه هما عايزين
يخلصوا منك .. لكن ده بعدهم .. وندرن عليا
ياكمونه والندرن يوفى الدين زى ما اتحقق كل
حرف قلته لازم يتحقق كل حلم حلمته .. وانا
وانتوا ياديا به والزمن طويل . (تخرج)

سوبر ماركت الناس

(سوبر ماركت .. هابى كفر وقد تغير كل شىء
فيه .. اللافتة أصبحت - سوبر ماركت الناس -
والبضاعة عادت بضاعة السوبر ماركت القديم -
عجائب والشحات ومسعده وقد عادت الى طبيعتها
الأولى وحولهم مجموعة من الناس)

عجائب	(تصرخ بهستيريا) بالتسعيره .
مسعده	(المجموعه) خير بالكيل وبضاعه كثيره .
المجموعه	بالتسعيره .
الشحات	عند عجائب قرب قرب ولا تتحير ولا تتغرب .
المجموعه	بالتسعيره .
عجائب	عهد الله وعهد الأبرار واللى يخون حيروح النار .
المجموعه	بالتسعيره .

عجائب	عهد الفقرا وعهد الجوع ما نبيع البيع الممنوع.
المجموعة	ولا يدخل قوت المجموع فى جراب البغل أبوكرشين.
عجائب	ومن دا بكره.
المجموعة	بقرشين.
الشحات	عند عجائب.
المجموعة	بقرشين.
عجائب	بابا قاللى صومى وصلى وبيعى تمللى بالقرشين.
المجموعة	ومن دا بكره.
عجائب	بقرشين.
فارس	(يدخل فى حالة توتر) عجائب اقللى بسرعة.
عجائب	(تستمر فى صراخها) قرب قرب ولا تتحير ولا تتغرب.
فارس	يا عجائب اسمعنى.
عجائب	فيه ايه يا فارس.
فارس	باقولك اقللى بسرعة.. دول جايبين يحرقوا السويرماركت.
عجائب	هما ما بيتعبوش من الشر والأذى.
فارس	مافيش وقت نضيعه يا عجائب.. ياللا نقفل قبل ماييجوا.

- عجائب بس احنا لو قفلنا نبقى بنقول لهم اتفضلوا احرقوا
براحتكم
- مسعده ولو فضلنا فاتحين حيحرقونا مع البضاعة.
- فارس لا يامسعده .. عجائب كلامها مضبوط .. احنا لازم
نقف فى السوير ماركت وندافع عنه .
- الشحات أيوه صحيح .. احنا لازم نفهم ان دول زى
الوطاويط ما بيطلعوش الا فى الضلمه .
- عجائب يعنى نعلق كلويات
- الشحات المسألة مش كده يا عجائب .. احنا الاول لازم
نعرف ايه هدفهم من الحريقة
- عجائب (بتهمكم) ده سؤال فنى طبعا سعادتك (تحية
عسكرية قوية) الهدف الواضح سعادتك هو حرق
بضاعة الناس فيقوم الجو يروق لهم والناس تحتاج
لهم .. فيبقوا على رأى المرحومة جدتى بضاعة
والناس جواعى تمام سعادتك ياباشا .
- مسعده اسم الله عليك وعلى عجائب وحتد افع بابيه ان
شاء الله .
- الشحات تمام التمام .. حتبقى مهمتنا الاساسيه هى حماية
البضاعة تمام يافندم .
- عجائب تمام التمام .. لكن حماية البضاعة محتاجه دماغ

مش عضلات تمام حضرتك	
تمام التمام	الشحات
(لفارس) بيقى دبرنى ياكابتن	عجايب
بيقى الحل ان احنا نهريها سعادتك	فارس
عفارم على افكار عشره زى حضرتك .. هو ده	الشحات
الحل	
يا أخى جاك حل وسطك منك له .. ومين بقى من	مسعده
غير شر اللى حيشيل دا كله دا بيقول لك بسم الله	
الرحمن الرحيم حيطلعوا الليله .	
بيقى مافيش حل غير الناس	فارس
(تنظر لفارس باعجاب) ياسلام عليك ياأبوالفوارس	عجايب
يامبدع فعلا مافيش غير الناس	
ياختى فين هما الناس	مسعده
قله بلا ميه - شقايه مرميه . فى الملقه منسيه . انتو	الشحات
هنا حراس . وانا على الناس . فى ظرف فتحة باب	
وقبل قفل الباب ... ح اجيب من الاحباب ... ألف	
وكمان ميه	
(يخرج)	
الناس .. الله الله على الناس .. تعرف ياواد يافارس	عجايب
الكلمه دى بتفكرنى بكمونه .. كان عاشق ولهان	
فى حب الناس	

خلينا فى الناس يا ست الكل .	فارس
ما الشحات راح يجيبهم	عجايب
مش حيلحق	مسعده
يبقى المغنى ياست الكل .. المغنى حياة الروح	فارس
المغنى حياة الناس ... ياللا نغنى نلم الناس .. قولوا	عجايب
ورايا - يالا نغنى نلم الناس (بدأ الناس فى التجمع	
والترديد خلف الشحات)	
قبل الفاس ما تقع فى الراس	عجايب
ياللا نغنى نلم الناس	الجميع
ياللا نغنى نلم الخلق	فارس
ياللا نغنى نلم الخلق	الجميع
قبل الروح ما تروح فى الحلق	فارس
ياللا نغنى نلم الخلق	الجميع
ياللا نغنى نلم العيله	فارس
ياللا نغنى نلم العيله	الجميع
قبل البوم ما يقوم الليله	فارس
ياللا نغنى نلم العيله	الجميع
وشوش يا عجايب	مسعده
وشوش يا عجايب	الجميع
(تدخل مجموعة الانشاد الدينى تنشد)	

المجموعة

فج النور فى المحظور

طلعوا الناس من الضلمه طابور

غمسوا الشمع بعرق العافيه

خلى الليل شعيلة نور

(يدخل كمونه فى هيئة الدرويش القديمه وهو

يحمل المبخره فتلمحه عجائب وتحاول أن تكتم

فرحتها برؤياه)

كمونه (يغنى استكمالاً لغناء مجموعة الانشاد)

عن مولانا الشيخ شقيان

عن مولاه صاحب الدكان

قالك شفت النبى حران

عز البرد وكان عرقان

شرب الشوك من عرقه اتمايل

فتح ورد جميل وخمايل

لجل حبيبك هاتها جمايل

ولا تكسر خاطر مجبور

المجموعة فج النور فى المحظور

طلعوا الناس م الضلمه طابور

غمسوا الشمع بعرق العافيه

خلال الليل شعيلة نور

- عجائب
 واد يا كمونة.. وحشتنى.. انت طلعت م السجن
 ازای
- كمونه
 زى الشعره من العجين.. والبركه طبعاً فى
 البلبوعه.. انا سايب السجن كله مبلع والله اعلم
 حيصحو امتى
- عجائب
 شفت ولاد الكلب عايزين يحرقونا
 كمونه
 عارف.. وصلتنى الأخبار فى السجن وعشان كده
 هربت... وناويين تعملوا ايه دلوقتى
- عجائب
 ح نهرب البضاعه وأدى احنا لمينا الناس
 كمونه
 ومستنيين ايه (يشاور لفارس والشحات فيقتربون
 منه وتبدو الدهشه على وجهيهما حين يتعرفان
 عليه ولكن يهمس لهما فيبتعدان عنه)
- فارس
 يأهالى كفر سين سمع هرووس.. مولانا الشيخ
 أبوالعزائم رسول السيد أبوالوفا الحلوانى حيكلمكم
 دلوقت سمع هووس.
- كمونه
 يأهالى كفر سين.. الليلادى حتواجهوا الامتحان..
 ياتبقوا قد القول وملو الهدوم وتستحقوا تعيشوا
 ياتناموا مواع الذل فى الشقوق وتضيعوا الحقوق
- عجائب
 ويبقى الموت لكم هو الخلاص
 كمونه
 خلاص مافيش خلاص غير بالمواجهه

فارس

وابن يوم مابيعيش يومين

عجائب

واللى احنا خايفين منهم ما يخوفوش قطه .. بنت
سبع تيام صدقونى انا لسه راجعه من هناك .. انا
كنت عايشه فى قلبهم .. قلب بعيد عن السامعين
والحاضرين خريان ومنخرب فيه السوس زى
الدرس المناقر اللى دواه الخلع من جدره .. هدم
هدوم ويا ما تحت الهدوم يا حاوى .. عاهات
وعلل وبلاوى متلتله مافيش هناك حاجه
بصحيح .. كله طلستة .. وكذب فى كذب احنا
خايفين منهم قيراط .. طيب ايه رأيكو بقى هما
خايفين منا ٢٤ واللى يجرب يشوف

كمونه

زمان كنتوا عايشين ومش عايشين وراقدين زى
الفراخ على جرح الوطن والنخوه والشرف .. مادام
كنتوا بتلاقوا اللقمه الحاف اللى تنسى الجوع
وتصبر على الهوان .. النهارده خلاص يا حلويين
حتى اللقمه الحاف استكثروها عليكم ..
السوبرماركت اللى فيه قوت الغلابه حيحرقوه
الليله قاتوا ايه يا أهالى كفرسين .

قلنا لأ

الجميع

قاتوا ايه

عجائب

الجميع قلنا لأ والله لأ

(تظهر اضاءة الحريق) (يدخل الشحات لاهثا)

الشحات حاس حاس.. النجدة يا حراس.. الحقى
يا عجايب.. حرقوا المخزن الفرعى وجايين على
هنا بالنار.

عجايب اطمن يا شحات الناس قررروا نقل البضاعة دى
حالا ونسبهم يحرقوا الحيطان

الجميع ياللا بينا

كمونه ايد فى ايد

عجايب روح فى روح

الجميع ياللا بينا

(يبدأ فى نقل البضاعة وهم يغنون)

هيا لىصا

هيا ياللا

ياللا بينا

هيا هوب

مهما سهم الظلم علا

احنا أعلى ولينارب

عجايب ربنا رب القلوب الطيبة

اللى شايله الحب

قدره وموهبه

زوق الارض الحنون المخصبة
بالامل فى الخضره طول ما فيها حب
هيلا ليصا.. هيلا ياللا
ياللا بينا.. هيلا هوب
مهما سهم الظلم علا
احنا أعلى ولينارب

فارس

كنا فين لما انكسر سيف الحقوق
والسراب والكذب عشب الف بوق
كنا فين

والخلق لابده فى الشقوق
واللى يرفع راسه يغطس لم يقب
هيلا ليصا.. هيلا ياللا
ياللا بينا.. هيلا هوب

المجموعة

هيلا ليصا
هيلا ياللا
ياللا بينا هيلا هوب
مهما سهم الظلم علا
إحنا أعلى ولينارب

كمونه
فرقونا عشنا فى الأوهام شتات

غيبونا واللى نصبح فيه نبات
غريونا واما ورد الحب مات
شربونا فى الأغانى الكذب حب
هيا ليصا هيا ياللا
ياللا بينا هيا هوب

عجائب

كفر سين ياكفر سين ياكفرنا
أخضر خضر خضر
والخضار من كفنا
إحنا البدار

وليه حصادك مش لنا
ملعون أبوه الظلم
لو للظلم أب

هيا ليصا هيا ياللا
ياللا بينا هيا هوب

المجموعة

هيا ليصا

هيا ياللا

هيا ياللا

ياللا بينا هيا هوب

مهما سهم الظلم علا

احنا اعلى ولينا رب

(بانتهاء الغناء يكون السوبر ماركت نَد خلا تماماً
 من البضاعة وانسحب الجميع)
 لم يبق سوى عجائب أصوات سارينات وضجة
 خارج السوبرماركت
 (يدخل الباشا على رأس قوة لإشعال الحريق
 فيصاب بالدهشة لخلو السوبرماركت من البضاعة
 ويتظاهر باللامبالاه والحديدى خلفه شاهر
 سلاحه).

الرئيس
 عجايب
 الرئيس
 عجايب
 كمونه

إيه .. لحقتى فلستى تانى يا عجايب .
 لا وانت الصادق ياباشا جبرنا والحمد لله
 كل البضاعة اتباعت .
 لأ لسه ده مشط كبريت اهه يمكن تحتاجوله .
 لا وفيه كمان هديه يمكن تلزم للباشا (يعطيه لفة
 ورق تواليت) لفة ورق تواليت .
 يعودون للغناء ...

فارس
 عجايب

هيا ليصا يالا بينا نضرب الزيف والمحال
 هى ضربه بيد واحده تنسف السور والجبال
 جينا رحنا .. إحنا إحنا مش حنخسر غير حبال
 كتفتنا سنين طويله يالا بينا هيا هوب
 هيا ليصا يا حبايب يالا بينا إيد فى إيد

بالاراده واحنا صحبه نفرش المهد السعيد
يحضن الاطفال جنابين
كل طفل في حضنه عيد
هيا ليصا يا حباب
ياللا بينا.. هيا هوب

تمت بحمد الله

- غار حراء -
الهرم الجمعه ١٥/١/١٩٩٣
الساعة التاسعة تماماً

بـحـضـور
أحمد محمد فاضل
وتابعه محمد فاضل
وتابعهما أحمد فؤاد نجم

عربية للطباعة والنشر

١٠، ٧ شارع السلام، أرض اللواء المهنيين

تليفون : ٣٠٣٦٠٩٨_٣٠٣١٠٤٣

تم عرض هذه المسرحية لأول مرة على مسرح البالون بتاريخ ١٥/١٠/١٩٩٤

الفرقة الغنائية الاستعراضية

موسيقى : فاروق الشرنوبى

ديكور : أشرف نعيم

استعراضات : كمال نعيم

المخرج : محمد فاضل

عجايب
يا جبر قول للسماك
طول ما الشبك فوو
لا العشو كارك
ولا رجل الشطوط شوقك
اتزل قرار التجا..
واغطس ولا تعقبش
موج لعدا الى خطر..
في النوة ومغلبش
داري على شمعك..
وتحب ما تحبش
الصبح نور ياسماك
واعشو على ذوقك

محمد فؤاد

